

粵海關志

第七册

貢舶
市舶
行商

(國學文庫第二十一編)

中華民國二十四年九月
北平隆福寺街
文殿閣書莊印行

粵海關志

第七册

貢舶
市舶
商行

(國學文庫第二十一編)

中華民國二十四年九月
北平隆福寺街
文殿閣書莊印行

據道光年刊本

(每行半葉二十九字)

重印

(實價國幣壹元貳角)

粵海關志第七冊目錄

卷二十一 貢舶一

暹羅國……………二

暹羅國入貢儀注事例……………二

會驗暹羅國貢物儀注……………一五

卷二十二 貢舶二

荷蘭國……………四

意達里亞國……………六七

博爾都噶爾雅國……………七四

卷二十三 貢舶三

噶咭喇……………九

琉球國……………一〇六

卷二十四 市舶

呂宋國……………一三

小呂宋國……………一八

呷喇喇國……………二三

米時哥國……………二三

噶喇巴國……………二三

瑞國……………二六

噠國……………三〇

咪喇擊國……………三一

咪唎喇國……………三三

馬塔喇國……………三三

嚙啁國 一三四

蘇喇國 一三四

雙鷹國 一三五

單鷹國 一三五

鷹國 一三五

嚙國 一三五

咩啫哩國 一三五

吡喇哖國 一三五

數閉盧國 一三七

甚波立國 一三七

咕咪啞國 一三七

啞啞國 一三六

啞啞國 一三三

越南國 一四四

歷年夷船來數 一五一

卷二十五 行商

行商 一六一

粵海關志卷二十一

貢舶一

臣謹案歷代正史皆列四夷傳所載諸國固有通貢中國者亦有但聞名而未嘗與中國通者故唐杜佑通典著其例曰於某代通焉於某代聞焉況海南諸國處大瀛之滌相去或三五千里遠者二三萬里揚帆乘舶之尤非可以道里計哉顧海邦檣幟之盛衰卽以覘中原幅員之廣狹洪惟我國家統一函夏聲教覃敷前代所稱海外蠻荒今皆時享歲貢府不絕書仰溯列聖在御疊沛鴻施獎暹羅之米舶貸其稅銀賚荷蘭之使臣逮及醫士貢品飄沒寬下次之補陳絲禁森嚴允夷商之籲請免金緞琉璃之納費加淺茶錦綺之優頒我皇上又軫念遠道馳

驅載塗雨雪改定越南琉球暹羅四年遣使朝貢一次考諸史傳所書
綏懷遠人實未有如我朝之有加無已者海隅出日罔不率俾殆不足
擬今茲梯航之盛矣

暹羅國

暹羅在占城國西南順風十晝夜可至隋唐赤土國後分爲羅斛暹二國
暹土瘠不宜稼羅斛地平衍種多穫暹仰給焉元元貞初暹人常入貢至
正間暹降於羅斛合爲一國明洪武初遣大理少卿聞良輔往諭之暹羅
斛國王參烈昭毘牙遣使奉金葉表朝貢還賜大統曆七年遣使沙里拔
來朝自言本國令陪臣柰思俚儕刺識悉替入貢云八月舟次烏瀦遇風
舟壞漂至海南收獲漂餘貢物蘇木降香兜羅錦來獻省臣以聞高帝以

無表可據卻之九年奉表來乃命禮部員外郎王恒中書省宣使蔡時敏往賜詔及暹羅國王之印二十年又貢胡椒萬觔蘇木十萬觔二十八年遣中使趙達宋福等弔祭賜嗣王昭祿羣膺勅諭並賜王及妃文綺羅襪絲布有差永樂元年遣使入賀始稱暹羅國二年遣使坤文貢方物詔內使李興等齎勅往勞之並賜文綺紗帛四年復貢方物且乞量衡爲式詔賜古今列女傳給與量衡七年遣使奉儀物祭仁孝皇后命中官以告几筵是歲復遣坤元現來貢方物先是南海民何八觀等流移海島遂入暹羅至是因其使歸傳諭國王遣八觀等還毋納流移以取罪戾並賚王金絨紵絲紗羅織錦八年貢方物送還流移人賜勅勞之嗣王三賴波磨札刺的興兵侵滿刺加滿刺加訴於朝詔平之其後復遣人朝貢且謝侵滿

刺加之罪厚賜之自是每貢賞賚則稍減矣成化十三年遣使羣謝提素英必美亞二人來貢方物美亞本福建汀州土人謝文彬也販鹽下海爲風飄入暹羅遂仕其國嘗至南都其從子瓚偶遇識之爲織殊色錦綺貿易番貨事覺下吏始吐實焉十七年遣行人姚隆冊封其王宏治中遣給事中林恒復往行冊封禮正德十年貢使至下回回館譯寫大學士梁儲疏據提督少卿沈冬魁呈准回回館主簿王祥等呈竊照本館專一譯寫回回字凡遇海中諸國如占城暹羅等處進貢來文亦附本館帶譯但各國語言文字與回回不同審譯之際全憑通事講說及降勅回賜俱用回回字今暹羅來貢金葉表文無人識認查近年八百大甸等處音字失傳內閣具題暫畱差來頭目藍者歌在館教習合無比照藍者歌事例於暹

羅來使內選留一二人，在館令其教習待肄業精熟，將本使照例送回。從之。嘉靖元年，暹羅及占城等國各載番貨至廣東市舶太監牛榮與家人蔣義山、黃麟等私買。至南京販賣稅司盤出，送南刑部問擬。蔣義山等違禁私販番貨例，應入官蘇木共三十九萬九千五百八十九觔，胡椒一萬一千七百四十五觔，可值銀三萬餘兩。解內府收貯公用。牛榮夤緣內璫得旨，給主刑部尙書林俊復疏言：「現行條例通番下海買賣劫掠有正犯，處死全家。邊衛充軍之條，買蘇木胡椒千觔以上，有邊衛充軍貨物入官之條，今蔣義山等倚恃威權，多買番貨。天幸匿稅事發，將牛榮等參奏。陛下方俞正法之請，尋啓用倖之門，忽令給主夫明主愛一頓一笑，敝袴以待有功。今三萬餘兩之物，豈一敝袴比？給還罪入，豈賜有功者比？皆臣等

之所未喻也伏望大奮乾剛立斷是獄將代爲營救之人並下法司明正其罪疏入乃命以贓貨入官三十二年國王遣使坤隨離等貢白象及方物白象已斃進象牙一枝長八尺牙首鑲金石榘子十顆中鑲珍珠十顆寶石四顆尾置金鋼錐一根又金盒內貯白象尾爲證萬曆三年九月國王昭華宋頃遣使握坤哪采思灣等來貢先是有東牛國與暹羅國鄰因求婚王女不諧遂擁眾攻暹羅陷其城王普喇照普啞先自盡擄其長子哪淳喇照爲質時隆慶三年七月也其次子昭華宋頃嗣爲王以印被兵焚因奏請另給禮部以印文頒賜年久無憑查給且表字譯學失傳難以辨驗覆題行彼國查取印篆字樣並取精通番字人員赴京教習五年八月通事握文源同其使握悶喇握文鐵握文貼齋原奉勘合赴京請印並

畱教習番字各賜冠帶衣服有差六年十月內閣大學士張居正題據提督少卿蕭某呈請於本館添設暹羅一館考選世業子弟馬應坤等十名送館教習通事握文源言其國東連大泥南臨東牛西接蘭場北界大海由廣東香山縣登舟用北風下指南針向午行出大海名七洲洋十晝夜可抵安南海次中有一山名外羅八晝夜可抵占城海次十二晝夜可抵大崑崙山又用東北風轉舟向未兼申三分五晝夜可抵大真樹港五晝夜可抵暹羅港入港二百里卽淡水又五日抵暹羅城順風四十日可至若遇東風飄舟西行卽舟壞猶可登山遇西風飄入東海中有山名萬里石塘起自東海琉球國直至海南龍牙山潮至則沒潮退方見舟飄至此罕有存者來貢必用五六月南風還則用十一二月北風過此不敢行矣

境內有大庫司九曰暹羅曰可刺細馬曰足曹本曰皮細緣曰束骨胎曰果平匹曰倒腦細曰討歪曰六毘大庫司猶華言布政司也府十四曰采納曰老無曰比采曰東板魯曰辣皮曰匹皮里曰采野曰多饒曰干無里曰細辭滑曰采欲曰款細灣曰沾奔曰魁山縣七十二分隸各府土田東南平衍饒稻西北多大山產諸香木蘇木城壕用磚砌分八門南北五里東西十里城中有小河通舟城外西南民居輳集有外城週遭十餘里王居在城西隅另建一城約三里餘殿用金粧綵繪覆以銅瓦室用錫瓦塔用錫裹磚欄杆用銅裹木民樓居不土處上聯檳榔片覆之亦有用陶瓦者坐臥卽於樓板上藉以氈及籐蓆無牀桌椅凳之制其服飾惟王以受封故畱髮冠金嵌寶石帽制類兜鍪上衣長三尺用五彩緞小袖左衽下

用五彩布幔鞋襪用紅緞官及庶民俱剪髮官一等至四等冠金嵌寶石帽五等至九等冠五彩絨緞帽庶民無帽俱著兩截衣襪履用牛皮婦人粧髻於後飾用金銀簪花戒指釧脂粉貧者用銅上衣披五色飛花布幔下衣五彩織金花幔拖地長二三寸足著紅黑皮鞞鞋其官制有九等一曰握啞往二曰握步喇三曰握蟒四曰握坤五曰握悶六曰握文七曰握板八曰握郎九曰握救其選舉由鄉鄰舉於大庫司大庫司審其堪用以文達於王所王爲定期面試至期大庫司引至王前咨以民事應對得當卽授官服候用否則逐出考課亦以三年爲期人皆有名無姓爲官者稱握某民上者稱柰某最下稱隘某王出乘金粧彩轎或乘象車每日且登殿各官於臺下設氈以次盤膝而坐合掌於頂獻花數朶有事則具文

書朗誦上呈候王定奪習水戰煑海爲鹽釀秫爲酒土產珍寶有石榴子
及貓兒眼青紅綠三色石金鋼鑽金銀鉛錫鐵玳瑁象牙犀角珠母食貨
有胡椒沉香速香降香木香丁香樹香金銀香大楓子馬前白荳蔻玉荳
蔻烏藥兒茶阿魏鴉片冰片紫梗藤黃破肚子燕窩沙國米黃臘檳榔椰
子布有西洋布闊三尺餘長四五丈染五色花紋極工巧花木有貓竹黃
竹斑竹勒竹根竹崇竹蘇木油木花梨木鐵力木樟木松木榕木柏木漆
木黃楊木檀木烏木石榴柑橘蓮菊茉莉素馨鶯爪月桂綿葵葛蒲葡萄甘
蔗芭蕉菱角棗薔薇露波羅蜜獸有犀象虎豹熊猴猿貂鼠穿山甲南蛇
山羊山牛山豬海馬獐麋兔鹿豺狐狸馬牛羊貓鼠禽有孔雀錦鷄鸚雉
鶴鶴鶯燕雁鴉雀鳩翡翠鶯鶯鴛鴦水鴨鴿鷄鵝鴨鸚鵡有五彩紅綠白

數色魚有鱷鯤沙鯉膾鯽齋銀墨章莆帶鱸黃烏邊鞋底班宗馬母大口
白甲笋殼七星三賴鯁鱔蝦螃蟹蛤蚌蔬有東瓜西瓜王瓜甜瓜木瓜土
瓜苦瓜瓠茄葱蒜韭芥莧蘿葡波凌鹿角油菜藤菜海菜角荳扁荳藁荳
黃荳紅荳諸物亦海外一大都會也

國朝定貢期三年一貢由兩廣總督廣東巡撫代題勅部議准後知照該
督撫令其入貢其貢使來有正使二使三使四使其下爲從人赴京者不
得過二十六人其貢物爲馴象備象龍涎香幼暎香犀角象牙荳蔻降香
騰黃大楓子土桂皮烏木蘇木葶撥樟腦兒茶皮樹膠皮硫磺檀香冰片
翠鳥皮孔雀尾闊紅布大荷蘭氈冰片油薔薇露又貢物一分其數減半
或有加進之物聽其隨宜進獻題准收受交內務府象交鑾儀衛表用金

葉貯以金筒錦襪錦袋袋上有金鈕金圈加盛以螺鈿盒一貼金盒一並有花緞盒套套上各有金圈其頒賞賜國王錦八匹織金緞八匹織金紗八匹織金羅八匹紗十二匹緞十八匹羅十八匹賜王妃織金緞四匹織金紗四匹織金羅四匹緞六匹紗六匹羅六匹貢使各織金羅三匹緞八匹羅五匹絹五匹裏紬二匹布一匹通事緞五匹羅五匹絹三匹從人各絹三匹布八匹件送官彭緞袍一件如貢使係微員視職分酌減通事從人等俱一例酌減賞給所賞國王王妃物件及特恩加賜物件俱禮部移內閣撰入勅內交貢使齎回

暹羅國入貢儀注事例

一貢使人等到省委員備辦牛酒米麪筵席等項俟起貯表文方物後前

赴犒賞

一起貨通事船主先期將壓艙貨物呈報廣州府轉報委員查明其貨物數目斤兩冊彙同表文方物由司詳候督撫會疏題報俟題允日招商發賣其應納貨餉候奉部行分別免征

一貢使入京通事將起程日期具報廣州府轉報布政司移會按察司頒發兵部勘合一道駙傳道路牌一張督撫委送官三員隨同伴送將進京貢使人員廩給口糧夫船數目填註勘合內經過沿途州縣按日辦應其在省看守貢船人等以奉旨准貢日移明糧道每名每日支米八合三勺

一貢使入京伴送文職應委道府大員武職應委參將大員並委丞倅二

員隨往長途護送自省起程前抵韶州府例委分巡廣州府之督糧道護送彈壓自韶州府南雄州度嶺應委南韶連道護送彈壓出境仍飾各屬照例應付不准絲毫濫應京旋之日一體辦理

一貢使進京令通事先將起程日期報府轉報上司預行取辦祭江豬隻吹手禮生應用

一貢使京旋委員自京護送勅書大典回廣船到河下迎請安奉懷遠駟館遵奉筵宴一次候風訊便日起程

一貢使京旋廣州府卽諭令各船修葺俟風訊順便回國所買回國貨物一切違禁物件不許買帶外其應買貨物俱照定例聽其買回應委官一員監督盤運下船並卽令護送該船出口俟其揚帆回報

又定貢使京旋回國在廣東省筵宴一次額支銀一十七兩五錢其守候船隻梢目水手等額支口糧於奉旨准貢之日起支貢使回廣之日住支件送之委員自省赴京往回額給盤費銀五十兩均於廣東存公銀內並地丁項下額支米內動支

會驗暹羅國貢物儀注

是日辰刻南海番禺兩縣委河泊所大使赴駙館護送貢物同貢使通事由西門進城至巡撫西轅門安放貢使在頭門外帳房候立俟兩縣稟請巡撫開中門通事行商護送貢物先由中門至大堂簷下陳列通事復出在頭門外兩縣委典史請各官穿公服至巡撫衙門通事引貢使打躬迎接候巡撫開門陞堂督撫各官正坐司道各官傍坐通事帶領貢使由東

角門報門進至大堂簷下行一跪三叩禮賜坐賜茶各官卽起坐驗貢畢將貢物仍先從中門送出西轅門通事引貢使由西角門出至頭門外立候送各官回將貢物點交通事行商貢使同送回駙館貯放

順治九年十二月遣使請貢並換給印勅勘合

順治十六年題准暹羅國探貢船壓艙貨物抽丈納稅

康熙二年暹羅國正貢船行至七洲洋面遇風飄失止有護貢船一隻來至虎門仍令遣回

康熙三年七月平南王尙可喜奏言暹羅國來餽禮物卻不受是年題准進貢正貢船二隻令員役二十名來京補貢船一隻令六人來京准該國貿易一次其年暹羅入貢方物凡十三種有孔雀六足龜

謹案是年定制孔雀六足龜後俱免進

康熙四年十一月國王遣陪臣握坤司吝喇耶低邁禮等齋金葉表文航海入貢其文曰暹羅國王森列拍臘照古龍拍臘馬噓陸坤司由提呀菩埃誠惶誠恐稽首頓首謹奏大清皇帝陛下伏以新君御世普照中天四海沾旃幪之德萬方被教化之恩卑國久荷天朝恩渥未傾葵藿之心今特躬誠朝貢敢效輸款敬差正貢使握坤司吝喇耶低邁禮副貢使握坤心勿吞瓦替三貢使握坤司勅博瓦綿大通事揭帝典辦事等臣梯航渡海齋奏金葉表文方物譯書一道前至廣省差官伴送京師進獻用伸拜舞之誠恪盡遠臣之職伏冀俯垂寬宥不恭微臣瞻仰天聖曷勝屏營之至謹具表稱奏以聞○聖祖仁皇帝命從優賞賚

康熙六年題定暹羅國貢期三年一次貢道由廣東例於常貢外有加貢無定額又覆准進貢船不許過三隻每船不許過百人來京員役二十二名其接貢探貢船概不許放入

康熙七年十一月遣陪臣握坤司吝喇耶低邁禮等來貢時部議以所貢物與會典不符應令後次補貢○得旨暹羅小國貢物有產自他國者與會典難以相符所少貢物免其補進以後但以伊國所有者進貢○是時貢物內有神幔一條非進天朝之禮交來使帶回

康熙九年入貢

康熙十一年三月遣使來貢○得旨貢使所攜貨物願至京師貿易則聽其自運或願在廣東貿易督撫委官監視之

康熙十二年二月遣使臣奉金葉表入貢其表文云暹羅國王臣森烈柏臘照古龍拍臘馬嘑陸坤司由提呀菩埃誠懽誠忭稽首頓首啓奏大清皇帝陛下伏以天生聖君嗣登寶位剛明果斷國治民安聲聞海外澤及諸彝卑國世荷皇恩微臣繼襲踐祚遠霑九重德化莫能瞻仰天顏幸遇貢期敢效輸款崑差正貢使臣握坤司吝喇耶低邁禮貳貢使臣握坤司殊嚙刺耶西三貢使臣握坤押派瓦恥通官握坤心物邁知理揭帝典辦事文司叨申理嘑等梯航渡海齎捧金葉表文方物譯書前至廣省差官伴送京師朝貢進獻代伸拜舞之誠恪盡遠臣之職恭祝皇圖永固帝壽遐昌伏冀俯垂鑒納庶存懷遠之義微臣遵旨再陳明季舊頒勅銀印卑國以憑進京朝貢前因宮殿火煨燼無存今進京朝貢無可爲憑微臣以

表文內不敢瑣瀆委握耶大庫具文呈部轉奏聖旨特賜勅銀印以便進京奉貢康熙九年三月內貢使回國禮部奉旨咨文到暹羅內開使臣具表題請伏望聖恩頒賜勅印以光屬國庶朝貢有憑按古例貢船三隻到廣貢使捧表進京朝貢其船置辦國需隨汎回國庶臣早知聖體興隆於次年再至廣省迎接聖勅回國伏乞俞旨賜依古例特勅禮部行文廣省各衙門遵照施行微臣不勝瞻天仰聖懼悚踴躍之至謹具表朝貢以聞

○後開貢物○皇帝方物金葉表文一道譯字表文一道龍亭一座

安本
金葉

表文馴象一隻孔雀四隻六足龜四隻龍涎香一觔盤石一觔沉水香二觔

犀角六座速香三百觔象牙三百觔安息香三百觔白荳蔻三百觔騰黃三百觔胡椒三百觔大楓子三百觔烏木三百觔蘇木三千觔胡椒花一

百觔紫梗一百觔樹皮香一百觔樹膠香一百觔翠鳥毛六百張孔雀尾
十屏兒茶一百觔鮫綃布六匹雜花色大布六匹幔天四條紅布十四匹紅
撒哈喇布六匹印字花布十四匹西洋布十四匹大冰片一觔中冰片二觔片
油二十瓢樟腦一百觔黃檀香一百觔薔薇露六十罐硫黃一百觔○皇
后方物一樣減半內止少
馴象○奉聖諭暹羅國航海遠來抒誠進貢其蟲蛙
短少等物免令補進嗣後各國皆照此例

四月册封暹羅國王頒鍍金駝紐銀印賜誥命令使臣齎回誥曰來王來
享要荒昭事大之誠悉主悉臣國家著柔遠之義朕纘承鴻緒期德教暨
於遐陬誕撫多方使屏翰躋於康乂彝章具在渙號宜頒爾暹羅國森烈
拍臘照古龍拍臘馬噶陸坤司由提呀菩埃秉志忠誠服躬禮義旣傾心

以向化乃航海而請封礪山帶河克荷維藩之寄制節謹度無忘執玉之心念爾惻忱朕甚嘉焉今封爾爲暹羅國王賜之誥命爾其益矢忠貞廣宣聲教膺茲榮寵輯乃封圻於戲保民社而王纂休聲於舊服守共球之職懋嘉績於侯封爾其欽哉無替朕命

康熙二十三年遣正使王大統副使坤亨述列瓦提從人三十名進金葉表文○奉旨覽王奏航海遠來進貢方物具見惻誠可嘉知道了餘著議奏○又奉聖諭暹羅國進貢員役回國有不能乘馬者官給夫轎從人給昇夫

是年暹羅國王奏言貢船到虎跳門地方官阻滯日久迨進至河下又將貨物入店封鎖候部文到時方准貿易每至毀壞乞勅諭廣省嗣後貢船

到虎跳門具報之後卽放入河下俾貨物早得登岸貿易又本國採辦器
用乞諭地方給照置辦○部議准應如該國王所請

康熙二十四年十二月閣部議准增賞暹羅緞幣表裏五十

康熙四十七年副貢船加進金線猴二隻又覆准暹羅國進貢船壓艙貨
物如願在廣東地方貿易照例免其收稅

康熙五十九年入貢方物加進馴犀二隻西洋金緞二疋大西洋闊宋錦
一匹

康熙六十一年四月遣使來貢賜其國王及王妃紗緞○奉旨朕聞暹羅
國米甚豐足價亦甚賤若於福建廣東寧波三處各運米十萬石來此貿
易於地方有益此三十萬石米係爲公前來不必收稅禮部問暹羅使人

定議具奏欽此○遵旨會問來使據稱該國米用內地斗量每石價值二三錢今議定載米到時每石給價五錢除爲公運三十萬石不收稅外其帶來米糧貨物任從貿易照例收稅

雍正二年十月二十八日廣東巡撫年希堯題報暹羅國運米併進稻種果樹○奉聖諭暹羅國遵聖祖仁皇帝諭旨不憚險遠進獻稻種果樹及洋鹿獵犬等物最爲恭順殊屬可嘉作何獎賞著定議具奏所奏穀種鹿犬已經差官送京各種果樹俟來歲春和另行委解運來米石令地方官照粵省現在時價速行發賣不許行戶任意低昂所奏每米一石定價五錢則賤買貴賣甚非朕體恤小國之意著行文浙閩此次已到之米與該國現經發運續到者皆照粵省一體遵行嗣後且令暫停俟有需米之處

候朕降旨遵行其壓船隨帶貨物本當照例征稅但該國王既能輸誠向化冒險遠來此次應輸稅銀著一概免征來船梢目徐寬等九十六名雖係廣東福建江西等省人民然住居該國歷經數代各有親屬妻子實難勒令還歸著照所請免令徐寬等回籍仍在該國居住以示寬大之典○賞船長羅緞共十三匹加賞十匹賞番梢每名絹布各十匹特賜國王各色內緞二十四匹瑛瑯器一件玉器七件松花石硯二方玻璃盃十件各色磁器一百四十六件差禮部司官一員齎送廣東交該督撫轉付船長領回

雍正四年覆准暹羅國前經奉旨暫停運米所差探貢二船帶有米石貨物伊等由該國起行尙在未奉旨之先既已涉險遠來聽其就近發買俟

風訊回國

雍正六年禮部議覆福建巡撫常賚疏言暹羅國王誠心嚮化遣該國商人運載米石貨物直達廈門請聽其在廈發賣照例征稅委員監督嗣後暹羅運米商船來福建廣東浙江者請照此一體遵行應如所請○得旨依議米穀不必上稅著爲例

雍正七年六月載米船艘因風飄泊其撈回壓船貨物並免征稅七月入貢方物加進寶劍一仗劍一金地交枝柳條版帶二○世宗憲皇帝御書天南樂國扁額賜之○又奉聖諭暹羅國遠隔重洋輸誠向化恭順修職歷有年所其所請採買物件著行令該撫採買賞給以示朕嘉惠遠人之意○又奉聖諭該國遠隔重洋所進方物齎送不易朕欲酌量裁減以示

恩恤遠藩之意但此次既已齎送難以帶回本國著照往例收納其常貢土物內有速香安息香等嗣後免其入貢

是年議准免貢安息香速香胡椒紫梗織金白袈裟織金紅袈裟織金紅幼布闊幼花布幼花布花布幔等物十種定如現額

是年該國使臣請出館觀覽京師之勝特賞銀一千兩聽其購買物件特賜國王與二年同惟玉器增一件玻璃盃減二件賜貢使緞八匹銀一百兩又准暹羅國貢使購買駝馬並動用內庫銀給以價值

其年十一月該國貢使復以採買京弓銅線上請○奉旨著採買賞給乾隆元年六月國王森烈拍照廣拍馬嘑陸坤司由提呀菩埃以嗣立故遣陪臣朗三立哇提等齎篆及方物例貢象一隻因航海故增一以備又

加進金緞二匹花幔一條並咨禮部言往時欽賜蟒龍大袍藏承恩亭上
歷世久遠難保無虞懇再邀恩賜一二襲○得旨暹羅遠處海洋抒誠納
貢除照定例給賞外可特賞蟒緞四匹○禮部言暹羅國昭丕雅大庫呈
稱伊國造福送寺需用銅斤奉禁之後無從採辦懇請准其赴粵採買查
銅斤關係鼓鑄禁止出洋定例已久今若准其採買恐日後奸商藉此爲
由越境滋弊應毋庸議○得旨暹羅遠處海洋抒誠納款採買銅斤一項
該國王稱係造福送寺之用部議照例禁止不許令其採買固是今特加
恩賞給八百觔後不爲例

乾隆七年福建將軍兼管閩海關事務新桂奏言本年七月內有暹羅國
商人方永利一船載米四千三百石零又蔡文浩一船載米三千八百石

並帶有蘇木鉛錫等貨先後進口查該番船所載米石皆不足五千之數所有船貨稅銀未便援例寬免○得旨該番等航海運米遠來慕義可嘉雖運米不足五千之數著免船貨稅銀十分之三以示優恤

乾隆八年奉聖諭上年九月閒暹羅商人運米至閩朕曾降旨免征貨船稅銀聞今歲仍復帶米來閩貿易似此源源而來其加恩之處自當著爲常例著自乾隆八年爲始嗣後凡遇外洋貨船來閩粵等省貿易帶米萬石以上者著免其船貨稅銀十分之五帶米五千石以上者免十分之三其米聽照市價公平發糶若民間米多不需糶買卽著官爲收買以補常社等倉或散給沿海各標營兵糧之用俾外洋商人得沾實惠不致有糶賣之艱該部卽行文該督撫將軍並宣諭該國王知之

乾隆十三年入貢方物外附洋船貢黑熊一隻鬪雞十二隻泰和雞十六隻金絲白肚猿一隻

乾隆十四年入貢○高宗純皇帝御書炎服屏藩扁額賜之又賜蟒緞片金粧緞閃緞各二匹錦四匹緞八匹玉器六件瑪瑙器二件琺瑯器四件松花石硯二方玻璃器十件磁器一百四十六件又因續進黑熊白猿等物加賞國王庫緞十二匹

乾隆十六年奉聖諭朕閱潘思榘摺內稱本年六月內收入廈口暹羅商船一隻買回米四千石等語閩浙各處現在需米孔殷若官爲辦理豈不於民食更有裨益但慮官辦或致外人多疑或聞內地官爲購覓卽乘勢居奇多方措勒必致價值日益昂貴並使商船來往亦不能隨便攜帶著

傳諭喀爾吉善潘思傑令其會同酌量若無此慮可於暹羅等國產米之處官爲購運或先行試買看其嗣後可以源源接濟不致啓番人措勒之弊抑或應仍聽商人陸續運帶一一詳籌奏聞○尋總督喀爾吉善等言該國地土廣不過百餘里戶口無幾每年餘米有無多寡並無一定官赴採買番情趨利如鶩難免居奇昂價止宜聽商自行買運尙可資其緩急官爲購運未便舉行○得旨俞允

乾隆十八年喀爾吉善奏言暹羅地方近年雖有商船帶回米石於民食不無裨濟但欲採買補倉勢須委員領帑前往買運若向商船招買過洋之米止可隨到隨糶不能日久貯倉今復加籌酌與其官買補倉不如仍聽商販帶運隨其多寡皆足有濟民食○得旨俞允

是年二月入貢方物加進西洋金花緞番袍金花緞夾褲各一條西洋金緞帶三條並懇賜人淺纓牛良馬象牙及通徹規儀○內監部議不可並飭使臣於歸國後曉諭國王恪守規制益勵敬恭○得旨方物照例收受其筵宴賞賚著加恩照上次例行○加賜人淺四觔錦緞共二十四匹及玉器瑪瑙器琺瑯器玻璃器磁器銅暖硯

乾隆二十二年入貢特賜國王蟒緞錦緞各二匹閃緞片金各一匹八絲緞四匹玉器瑪瑙器各一件松花石硯二方琺瑯器十三件磁器一百四十四件

乾隆二十七年入貢

乾隆三十一年入貢皆蒙特賞物件後該國爲花肚番卽緬甸所破經兩

廣總督奏明將三十一年原頒賞賜繳進

乾隆四十六年正月暹羅國長鄭昭遣使臣朗丕彩悉呢霞握撫突等二人入貢並奏稱自遭緬匪侵陵雖復土報仇紹裔無人茲羣吏推昭爲長遵例貢獻方物○得旨國長遣使航海遠來具見惻忱該部知道原表並發○賜宴使臣於山高水長所貢之物賞收象一隻犀角一擔其象牙洋錫騰黃胡椒蘇木准其在廣省自行變價併壓艙貨物一體免稅特賞國長蟒緞錦緞閃緞片金八絲緞玉器瑪瑙器瑤器磁器松花石硯

乾隆五十年入貢正月初二日紫光閣筵宴賞正使二使三使有差
乾隆五十一年奉聖諭據穆騰額奏稱暹羅國每年正副貢船到關其隨帶之船至十餘隻之多又有藉名探貢船隻俱屬內地商船所帶貨物甚

多該監督查明應征稅銀若干報明該督撫具題概行寬免殊非杜弊防奸之道請將正副貢船各一隻照例免其納稅其餘船隻俱按貨征稅等語暹羅國修職輸誠遣使呈進方物其正副貢船自應免其征納稅銀豈容內地商船藉名影射希圖免稅此等商船到關時該監督原可逐船履勘除貢物之外若有私帶船隻無難一望而知自應按貨征稅該監督卽當商之督撫分別辦理何得概予具題邀免此係該督撫監督等分內應辦之事何必形之章奏候朕降旨始奉行耶除就近傳知穆騰額遵辦外著傳諭富勒渾孫士毅於該國貢船到關所有正副貢船各一隻仍照例具題免稅其餘若果查係夾帶客商私船俱逐一查明按貨納稅以杜奸商取巧通國弊混之計將此傳諭知之

乾隆五十二年入貢賜宴紫光閣賞正副使有差

乾隆五十三年該國遣使入謝

乾隆五十四年入貢賜宴紫光閣賞正副使有差

乾隆五十五年入貢恭祝萬壽賜宴紫光閣賞正副使有差加賞國王御書福字一個玉如意一柄玉器二件磁器玻璃器八件福字方一百幅大小絹箋四卷硯二方筆墨六匣雕漆盤四件

乾隆五十六年入貢賜宴紫光閣賞賚有差

乾隆五十八年入貢賜宴紫光閣賞正副使有差加賞國王大緞福字箋絹箋雕漆茶盤筆墨硯

乾隆六十年貢方物龍涎香沉香檀香白膠香降真香金鋼鑽冰片樟腦

孔雀尾犀角象牙西洋氈西洋紅布翠鳥皮甘蜜皮桂皮華撥大楓子荳蔻藤黃烏木蘇木皇后方物其數減半除夕賜宴保和殿

嘉慶元年恭進太上皇帝皇上番字金葉表文漢字表文並方物正月初四日舉行千叟宴賜正副使宴於寧壽宮又宴於紫光閣正大光明殿山高水長加賞有差

嘉慶二年入貢賜宴如例

嘉慶四年入貢賜宴如例

嘉慶六年入貢賞使臣羊裘纓帽○又奉聖諭暹羅國第二貢使帕窩們孫哖哆呵叭突在廣州南海地方患病身故情殊可憫現已飭地方官妥爲照料著加恩再賞銀三百兩遇有該國便船卽令先行帶回將銀兩給

伊家屬不必等候此次貢船回國轉致稽緩嗣後如遇有此等外國使臣在內地身故之事著照此例辦理

嘉慶七年入貢賞正副使有差

嘉慶九年入貢重華宮筵宴加賞使臣通事有差

嘉慶十二年九月奉聖諭外洋諸國夷人自置貨船來廣貿易自應專差夷目親自管駕不得令內地商人代爲販運今金協順陳澄發皆以內地客商領駕暹羅國船隻載貨販賣雖詢明委係該國王所遣並無假冒捏飾及夾帶違禁貨物但該國王何以遽肯造船交伊等管帶情節不無可疑且恐日久相沿必致奸徒潛往外夷賒欠誑騙或竟冒爲夷貨代盜銷贓不可不防其漸吳熊光請勅下禮部於該國貢使到京時傳知飭禁恐

該貢使回國傳述未能詳切現已另降勅諭申明內外體制所有金協順等船二隻既已駛至內地姑准其起貨納稅另製新貨給照回帆自此次飭禁之後如再有代駕夷船進口卽查明懲辦○又勅諭暹羅國王鄭華嘉慶十二年九月據兩廣總督吳熊光奏稱有船商金協順陳澄發裝載暹羅國貨物來粵貿易並請於起貨後裝載粵省貨物回赴暹羅經地方官查明金協順係福建同安縣人陳澄發係廣東澄海縣人飭傳暹羅國貢使丕雅史滑釐詢問據稱金協順陳澄發二船委係由該國新造來粵因該國民人不諳營運是以多僱福潮船戶代駕並非冒捏呈遞譯書稟結等情天朝綏懷藩服准令外域民人赴內地懋遷貨物惠逮遠人恩至渥也惟是中外之限申畫釐然設關譏禁古有明訓我朝撫御諸邦如朝

鮮越南琉球等國各以本地物產來中土貿易皆係其本國民人附朝貢之便齎帶前來從未有中國之人代彼經紀者今金協順陳澄發以閩廣商民代暹羅營運卽屬違禁中土良民謹守法度斷不敢越制牟利其私涉外域者此中良莠不齊設將販運貨物隱匿拖欠致啓訟端亦於該國諸多未便本應將金協順等飭法治罪念其船隻係由該國製造給令代駕從前未經嚴立科條此次且從寬免究並施恩准其起貨售兌仍給照令其置貨回帆特降勅諭知該國王宣明例禁嗣後該國王如有自置貨船務用本國人管駕專差官目帶領同來以爲信驗不得再交中國民人營運若經此次勅禁之後仍有私交內地商民冒託往來者經關津官吏人等查出除不准進口起貨外仍將該奸商治罪該國王亦難辭違例之

咎柔遠能邇寬既往以示含宏之義宅中馭外申明禁以嚴踰越之防爾國王其凜遵毋忽特諭

是年貢使到京重華宮筵宴加賞有差

嘉慶十四年祝嘏進貢壽燭十對金鋼鑽一觔冰片二觔燕窩十觔沉香二十觔犀角二十觔孔雀尾五十屏翠鳥皮五百張檀香一百觔降真香一百觔砂仁米一百觔紫梗一百觔象牙二百觔荳蔻二百觔胡椒二百觔騰黃二百觔荷蘭氈二領加賞正副使筵宴重華宮如儀○其國王表請僱僱內商駕船○奉旨不准表文給還夷目帶回

嘉慶十五年暹羅國世子遣使進貢請封在洋遭風沉失貢物九種○奉聖諭據百齡等奏暹羅國齎貢使臣抵粵一摺該國貢船在香山縣荷包

外洋突遇颶風擊壞沉失貢物此實人力難施並非使臣不能小心防護其沉失貢物不必另行備進用昭體恤所有鄭佛懇請勅封之處著該衙門照例查辦俟該使臣回國卽令領齎○十二月貢使到京宴賚如儀

嘉慶十七年十二月入貢

嘉慶十八年十二月奉聖諭前據蔣攸銛奏暹羅國正貢船隻在洋失火所載貢使人役及表文方物等件俱無下落僅有副貢船抵粵當經降旨將該國副貢使及所存貢品十種派員送京無庸補備正貢今又據蔣攸銛奏該副使唧拔察哪丕汝知突因在海船感冒風寒又聞正貢船失火焚燒致受驚恐現在患病難以起程請俟醫治痊愈再行護送入都等語該副貢使患病受驚正需調理長途跋涉甚非所宜現已屆年節不必再

令進京著加恩令將所存貢品十種就近交貯粵省藩庫由該督委員解京其副貢使令在粵休息妥爲調治該國王抒忱納費其正副貢使適因事故不能到京而航海申虔卽與齋呈無異所有例賞該國王及貢使人役物件著禮部查明奏聞將賞件發交該督轉行頒給該副貢令其於病痊之日齋領回國並將此旨傳知該國王以示懷柔遠人之意○禮部遵旨將例賞物件併勅書交兵部發交該督頒給

嘉慶十九年該國遣使補貢正貢船遭風漂至越南副使在粵患病該國王聞遭風之信復補備貢物遣使來京賜宴紫光閣賞正副使有差

嘉慶二十年九月奉聖諭蔣攸銛等奏暹羅國王聞上年貢船被風損壞復備副貢船遣使補備方物到粵一摺暹羅國所進嘉慶十八年正貢船

在洋焚燒其副貢船所齎貢品業經進呈十九年該國王敬補方物分裝正副船入貢適遇颶風漂散現在正副船已先後收泊其表文方物由該貢使齎送赴京該國王因聞貢船遭風之信復備補貢方物來粵其恭順實屬可嘉該國向係三年一貢明年又屆入貢之期著加恩卽將此次齎到方物作爲嘉慶二十一年例貢交粵省藩庫存貯俟明年委員解京其使臣巧變紋是通畱於粵省俟本年進京各貢使旋粵時一體筵宴俾令回國並傳知該國王明年無庸另備表文方物航海遠來以示懷柔至意○貢使到京同樂院聽戲賞正副貢使有差○暹羅國王復表請用內地水手○禮部奏駁○奉旨依議

嘉慶二十四年副使到京進萬壽貢大壽燭五對小壽燭五對冰片二兩

金鋼鑽一觔沉香二十觔燕窩十觔犀角二十觔檀香二百觔荷蘭毯二
領降眞香一百觔荳蔻二百觔砂仁二百觔胡椒二百觔翠鳥皮五百張
孔雀尾五十屏象牙二百觔騰黃二百觔紫梗二百觔又貢方物如例加
賞副使玉如意仙果獻瑞花普洱茶膏人蔘膏蜜餞荔支哈蜜瓜賜宴正
大光明殿入同樂園聽戲

道光二年入貢方物

道光三年進萬壽貢

道光七年入貢方物

道光九年入貢方物

道光十年進萬壽貢

道光十一年入貢方物

道光十四年入貢方物

道光十七年入貢方物

道光十九年三月奉上諭向來暹羅三年一貢著改爲四年遣使朝貢一次用示朕綏懷藩服之至意

粵海關志卷二十二

貢舶二

荷蘭國

荷蘭又名紅毛番地近佛郎機明永樂宣德時鄭和七下西洋歷諸番數十國無所謂荷蘭者其人深目長鼻髮眉鬚皆赤足長尺二寸頤偉倍常萬曆中福建商人歲給引往販大泥呂宋及咬囉吧者荷蘭人就諸國轉販未敢窺中國也自佛郎機市香山據呂宋荷蘭聞而慕之二十九年駕大艦攜巨礮直薄呂宋呂宋人力拒之則轉薄香山澳澳中人數詰問言欲通貢市不敢爲寇當事難之稅使李道卽召其酋入城遊處一月不敢聞於朝乃遣還澳中人慮其登陸謹防禦始引去海澄人李錦及奸商潘

秀郭震久居大泥與荷蘭人習語及中國事錦曰若欲通貢市無若漳州者漳南有澎湖嶼去海遠誠奪而守之貢市不難成也其酋麻韋郎曰守臣不許柰何曰稅使高案嗜金銀甚若厚賄之彼特疏上聞天子必報可守臣敢抗旨哉酋曰善錦乃代爲大泥國王書一移案一移兵備副使一移守將俾秀震齎以來守將陶拱聖大駭亟白當事繫秀於獄震遂不敢入初秀與酋約入閩有成議當遣舟相聞而酋卞急不能待卽駕二大艦直抵澎湖時三十二年之七月汛兵已撤如入無人之墟遂伐木築舍爲久居計錦亦潛入漳州偵探詭言被獲逃還當事已廉知其狀並繫獄已而議遣二人諭其酋還國許以自贖且拘震與俱三人旣與酋成約不欲自彰其失第云我國尙依違未定而當事所遣將校詹獻忠齎檄往諭者

乃多攜幣帛食物覬其厚酬海濱人又潛載貨物往市酋益觀望不肯去
當事屢遣使諭之見酋語輒不競愈爲所慢而案已遣心腹周之範詣酋
說以三萬金餽案卽許貢市酋喜與之盟已就矣會總兵施德政令都司
沈有容將兵往諭有容負膽智大聲諭說酋心折乃曰我從不聞此言其
下人露刃相詰有容無所懾盛氣與辯酋乃悔悟令之範還所贈金止以
哆囉噠玻璃器及番刀番酒餽案乞代奏通市案不敢應而撫按嚴禁奸
民下海必誅由是接濟路窮番人無所得食十月末揚帆去巡撫徐學聚
劾秀錦等罪論死遣戍有差然是時佛郎機橫海上紅毛與爭雄復汎舟
東來攻破美洛居國與佛郎機分地而守後又侵奪臺灣地築室耕田久
畱不去海上奸民闌出貨物與市已又出據澎湖築城設守漸爲求市計

守臣懼禍說以毀城遠徙卽許互市番人從之天啓三年果毀其城移舟去巡撫商周祚以遵諭遠徙上聞然其據臺灣自若也已而互市不成番人怨復築城澎湖掠漁舟六百餘艘俾華人運土石助築尋犯廈門官軍禦之俘斬數十人乃詭詞求款再許毀城遠徙而修築如故已又泊舟風櫃仔出沒浯嶼白坑東椗莆頭古雷洪嶼沙洲甲洲間要求互市而海寇李旦復助之濱海郡邑爲戒嚴其年巡撫南居益初至謀討之上言臣入境以來聞番船五艘續至與風櫃仔船合凡十有一艘其勢愈熾有小校陳士瑛者先遣往咬疍吧宣諭其王至三角嶼遇紅毛船言咬疍吧王已往阿南國因與士瑛偕至大泥謁其王王言咬疍吧國主已大集戰艦議往澎湖求互市若不見許必至構兵蓋阿南卽紅毛番國而咬疍吧大泥

與之合謀必不可以理論爲今日計非用兵不可因列上調兵足餉方略部議從之四年正月遣將先奪鎮海港而城之且築且戰番人乃退守風櫃城居益增兵往助攻擊數月寇猶不退乃大發兵諸軍齊進寇勢窘兩遣使求緩兵容運米入舟卽退去諸將以窮寇莫追許之遂揚帆去獨渠帥高文律等十二人據高樓自守諸將破擒之獻俘於朝彭湖之警以息而據其臺灣者猶自若也崇禎中爲鄭芝龍所破不敢窺內地者數年乃與香山佛郎機通好私買外洋十年駕四舶由虎跳門薄廣州聲言求市其酋招搖市上奸民視之若金穴蓋大姓有爲之主者當道鑒濠鏡事議驅斥或從中撓之會總督張鏡心初至力持不可乃遁去已爲奸民李葉榮所誘交通總兵陳謙爲居停出入事露葉榮下吏謙自請調用以避禍

爲兵科凌義渠等所劾坐逮訊自是奸民知事終不成不復敢勾引而番人猶據臺灣自若其本國在西洋者去中華絕遠華人未嘗至其所恃惟巨舟大礮舟長三十丈廣六丈厚二尺餘樹五桅後爲三層樓旁設小窗置銅礮桅下置二丈巨鐵礮發之可洞裂石城震數十里世所稱紅夷礮卽其製也然以舟大難轉或遇淺沙卽不能動而其人又不善戰故往往挫衄其所役使名烏鬼入水不沉走海面若平地其舵後置照海鏡大徑數尺能照數百里其人悉奉天主教所產有金銀琥珀瑪瑙玻璃天鵝絨瑣服哆囉嚏國土旣富遇中國貨物當意者不惜厚資故華人樂與爲市

謹案明史外國傳作和蘭乾隆五十九年奉旨噴囁國改寫荷蘭國

荷蘭貢無定期由福建巡撫代題勅部議准後知照該撫令其入貢

謹案荷蘭貢道後改由廣東康熙六年荷蘭違例從福建入境又經題
准嗣後務由廣東

荷蘭貢使有正使副使或專以正使一員其次爲夷目官爲掌書記各一
員其下爲從人凡入京者不得過二十名其貢物大尙馬珊瑚珠照身鏡
琥珀丁香檀香冰片烏鎗火石哆囉絨嗶嘰緞織金氈自鳴鐘凡十三種
皆無定數使臣有自進方物者俱照例題明准其收受其頒賞賜該國王
大蟒緞三匹粧緞三匹倭緞三匹片金一匹閃緞五匹帽緞五匹藍花緞
五匹青花緞五匹藍素緞五匹衣素緞五匹綾十四匹紡絲十四匹羅十
匹絹二匹銀三百兩正使大蟒緞二匹粧緞二匹倭緞二匹帽緞一匹藍
花緞四匹青花緞四匹藍素緞三匹綾六匹紡絲六匹絹四匹銀一百兩

標官粧緞一匹藍花緞二匹青花緞一匹藍素緞一匹紡絲二匹絹二匹
銀五十銀副使同庫官掌案官倭緞一匹藍花緞一匹青花緞一匹藍素
緞一匹紡絲一匹綾一匹紬一匹絹一匹銀四十兩夷目官掌書記官同
從人紬二匹絹二匹銀十五兩通事及伴送官各彭緞袍一件所賜國王
物件禮部俱移內閣撰入勅內交來使齎回

順治九年鄭成功寇鎮江敗歸謀取臺灣會荷蘭通事何弒逋夷負遁鹿
耳門說成功以水師從鹿耳門入與荷蘭相持久荷蘭戰敗棄臺灣去次
年請貢兼請貿易廣東巡撫具奏經部議駁

順治十二年復來請貢禮部言荷蘭國從未入貢今重譯來朝誠朝廷德
化所致念其道路險遠准五年一貢貢道由廣東入至海上貿易已經題

明不准應聽在館交易照例嚴飭違禁等物○得旨荷蘭國慕義輸誠航海修貢念其道路險遠著八年一次來朝以示體恤遠人之意○使臣進貢方物哆囉絨倭緞各二匹嘩嘍緞六匹西洋布二十四匹琥珀十塊琥珀珠珊瑚珠各二串鏡一面人物鏡四面白石畫二面鍍金刀鑲銀刀各一把烏鎗長鎗各二桿玻璃杯雕花木盒石山匣各二箇纓帽一頂皮小
狗二箇花鸚哥一箇四樣酒十二瓶薔薇露二十壺○奉旨賞件送官巡海道鑲領蟒袍一件護送兵丁緞袍一件○貢使歸國特降勅諭賜其國王曰惟爾荷蘭國墨投爲也甲必丹物馬綏掘僻在西陲海洋險遠歷代以來聲教不及乃能緬懷德化效慕尊親擇爾貢使杯突高嚙惹諾皆色等赴闕來朝虔修職貢地逾萬里懷忠抱義朕甚嘉之用是優加錫賚大

蟒緞二匹粧緞二匹倭緞二匹閃緞四匹藍花緞四匹青花緞四匹藍素
緞四匹帽緞四匹衣素緞四匹綾十四匹紡絲十四匹羅十四匹銀三百兩以報
孚忱至所請朝貢出入貿易有無雖灌輸貨貝利益商民但念道里悠長
風波險阻舟車跋涉閱歷星霜勞動可憫若朝貢頻數猥煩多人朕皆不
忍著八年一次來朝員役不過百人止令二十人到京所攜貨物在館交
易不得於廣東海上私自貨賣爾其體朕懷保之仁恪恭藩服慎乃常賦
祇承寵命

順治十三年貢使嘩嚙哦吡哈哇噫等到京貢鑲金鐵甲一副鑲金馬
鞍一副鑲金刀鑲銀劍各六把烏鎗十三口鑲金烏銃四口短銃七口細
銃二口銃藥袋三箇玻璃鏡四面鑲銀千里鏡八角大鏡各一面琥珀五

十觔珊瑚珠琥珀珠各二觔珊瑚樹二十枝哆囉絨五匹嗶嘰緞四匹西洋布一百匹被十二牀花被面六牀大氈一牀中氈二牀毛纓六頭丁香五箱共二百觔番木蔻一箱重三百六十觔五色番花三包共三百五十觔桂皮二包共二百一十觔檀香十石共一千觔恭進皇后鏡一面玳瑁匣玻璃匣烏木飾人物匣各一箇珊瑚珠琥珀珠各三串琥珀四塊哆囉絨二匹嗶嘰緞三匹西洋布十八匹白倭緞一匹花氈一牀花被面二牀玻璃杯四箇花石盒三箇白石畫二面薔薇露十壺

康熙二年三月荷蘭遣其戶部官老磨軍士丹鎮總兵官巴連衛林等朝貢請貿易○奉旨准二年貿易一次

康熙三年大兵渡海攻鄭錦等進克廈門荷蘭國率舟師助勤以夾板船

乘勢追擊斬首千餘級遂取浯嶼金門二島事由靖南王耿繼茂入奏○
賜國王文綺白金等物

康熙五年貢方物大尙馬四匹鞍轡具鍍金鑲銀馬銃起花金刀各八把
鑲金鳥銃三把鑲金小銃六把大哆囉呢大嘩噠緞各十六匹中哆囉呢
嘩噠緞各八匹小哆囉呢一匹嘩噠緞各四匹荷蘭絨大花緞各六匹荷
蘭五色大花緞三四大紫色金緞紅銀緞各一匹大珊瑚珠二百零二顆
五色絨氈五色毛氈各二領西洋花布三十六匹西洋白細布西洋小白
布各一百匹西洋大白布六十四匹西洋五色花布褥十五領照身大鏡二
面小車一張西洋白小牛二隻琥珀四塊共五觔八兩牡丁香白胡椒各
五百觔檀香三千觔象牙五枝琉璃器皿一箱使臣又恭進珊瑚珠四串

琥珀一塊沉香六塊蜜蠟金匣銀盤盛珠銀盒各一箇火鷄蛋四箇二眼
長鎗二眼馬銃小鳥銃各二把鐵甲一領白爾善國緞褥一條哆囉絨十
匹海馬角二塊小馬銅獅各一箇小狗二箇銅山一架銅礮二對刀二把
照水鏡四面薔薇露二十罐賞正使親男一名係閒散照從人例賞給伴
送守備三等馬一匹照磨官及土通事各緞袍一件護送兵丁彭緞袍一
件○奉旨荷蘭國既八年一貢其二年貿易永遠停止

康熙六年五月國王噶嘍吧王油煩馬綏極再遣陪臣奉表入貢有刀劍
八皆可屈伸馬四鳳膺鶴脰迅速異常

康熙二十五年六月國王耀漢連氏甘勃氏遣使賓先吧芝表獻方物哆
囉絨十四鳥羽緞四匹倭緞一匹嘩噠緞二十四織金花緞五匹織金大

絨氈四領白幼軟布二百十九匹文彩幼織布十五匹大幼布三十四匹
幼毛裏布一百匹大珊瑚珠六十八顆琥珀十四塊照身鏡江河照水鏡
各二面照身月水鏡一面自鳴鐘一座琉璃鏡一架聚耀燭臺一懸琉璃
盃五百八十箇象牙五枝鑲金鳥銃鑲金馬銃小馬銃起花佩刀各二十
把馬銃鳥銃鑲金刀劍利闊劍各十把彩色皮帶二十佩繡皮帶十佩起
花金劍六把火石一袋雕製夾板船大小三隻丁香三十石檀香二十石
冰片三十二觔肉荳蔻四觔丁香油薔薇花油檀香油桂皮油各一罐葡
萄酒二桶使臣又進方物銀盤銀瓶各一箇西洋刀頭六柄荷蘭花緞哆
囉呢羽緞各一匹哆囉絨四匹倭緞織金線緞嗶嘰緞各二匹西洋咁馬
氏布西洋毛裏布西洋沙南匏布西洋佛咬嘜布各二十四匹請定進貢限

期五年一次又貢船例由廣東入但廣東路近而泊地險福建路遠而泊地穩請由福建入○部議貢期如所請荷蘭國貿易處所止許在廣東福建兩省○賜勅諭曰朕惟柔遠能邇盛化之嘉謨修職獻琛藩臣之大節輸誠匪懈寵賚宜頒爾荷蘭國王屬在遐方克抒丹悃遣使齎表納貢忠盡之忱良可嘉尙用是降勅獎諭並賜王文綺白金等物王其祇承益勵忠貞以副朕眷○又定減貢額嗣後荷蘭貢物止令進大尙馬珊瑚等十三種其織金緞羽緞倭緞及各樣油小箱腰刀劍布琉璃鐙聚耀燭臺琉璃盃肉荳蔻葡萄酒象牙皮袋夾板樣船俱免其進獻由是職貢彌謹雍正初年通市不絕夏秋交來廣由虎門入口至冬乃回歲以爲常

乾隆元年特命減荷蘭稅額○諭曰朕聞外洋紅毛夾板船到廣時泊於

黃埔地方起其所帶礮位然後交易俟交易事竣再行給還至輸稅之法每船按梁頭徵銀二千兩左右再照則抽其貨物之稅此向例也乃近來夷人所帶礮位聽其安放船中而於額稅之外將伊所攜置貨現銀另抽一分之稅名曰繳送亦與舊例不符朕思從前既有起礮之例此時何得改易至於加添繳送尤非朕嘉惠遠人之意著該督查照舊例按數裁減並將朕旨宣諭各夷人知之

乾隆二十七年准荷蘭國夷商每船配買土絲五千觔二蠶湖絲三千觔是年十月荷蘭商人許力等呈稱彼國無織紉之工求量帶紬緞經兩廣總督蘇昌奏准每絲千觔扣帶紬緞八百觔著爲例

乾隆五十八年十月奉聖諭據蘇楞額奏凡紅毛貨船進口與各國夷船

一律丈量收稅等語前因曠咭喇遣使航海遠來輸誠納費是以格外加恩將攜帶貨物免其納稅係指此次貢船而言外省辦事往往膠柱鼓瑟或因有此旨意存拘泥竟將該國別貢貿易商船概行免稅轉致西洋各國心生冀望紛紛籲請一體免稅成何事體著傳諭蘇楞額務遵前旨固不可例外浮收亦不得於貢船之外概行減稅惟當按照定例收納以昭平允

乾隆五十九年十月奉聖諭長麟等奏荷蘭國遣使齎表納貢懇求進京叩祝一摺披閣長麟等譯書原表該國王因明年係朕六十年普天同慶專差貢使齎表到京叩賀情詞極爲恭順長麟等因其表文係公班大臣呢嚨波等代伊國王出名與體制稍有不符復加盤詰何必如此深論自

應准其來京瞻覲遂其向慕之忱著長麟等卽傳諭該使臣等知悉並派
委妥員護送起程祇須於十二月二十日封印前一二日到京俾得與蒙
古王公及外藩諸國使臣一體同邀宴賞並著知會沿途經過省分令各
督撫一體派員按例照料以便如期到京再荷蘭因所進表文在京西洋
人不能認識並著長麟等於住內地之西洋人有認識荷蘭字體兼通漢
語者著派一二人隨同來京以便通譯將此由六百里諭令知之○十二
月奉聖諭上年暎咭喇國遣使來京恭進表貢所有經過各省曾令各該
督撫給與筵宴此次荷蘭國遣使來京本日據陳准具奏未經給宴但該
國慕化輸誠航海遠至自因知上年暎咭喇使臣到京時得蒙天朝恩錫
優渥宴賚駢蕃是以聞風踵至今該使臣等在途經過省分未預筵宴是

同一西洋進貢使臣轉似區分厚薄失中國正大之體該貢使等聞知未免稍覺缺望除俟該使臣等到京後一體酌加賞賚外著傳諭各該督撫將來該使臣等回程經過時俱仍仿照曠咭喇使臣之例酌給筵宴時並宣諭該使臣等此次爾等慕化遠來大皇帝鑒爾恭順從前爾等進京時原應筵宴但因爾等趕於年內到京沿途行走期限緊迫恐耽延時日是以未經筵宴今爾等回程舒徐仍遵旨賞爾等筵宴等語向其明白宣示該使臣等聞知自必益臻歡感也○是年貢使到京貢萬年如意八音樂鐘一對時刻報喜各式金表四對鑲嵌金小盒一對鑲嵌帶版四副珊瑚珠一百八顆琥珀珠一百八顆千里鏡二枚風鎗一對金銀絲三十觔琥珀四十觔各色花氈十版各色羽緞十版各色大呢十版西洋布十四匹地

甌二張大玻璃鏡一對花玻璃壁鏡一對玻璃掛鐘四對燕窩一百觔檀香五百觔荳蔻一百觔丁香二百五十觔檀香油三十瓶丁香油三十瓶

○奉旨該國王例賞物件內銀三十兩折玉器二件又加賞玉如意一柄御書福字大紅龍緞大紅蟒緞百花粧緞閃緞漳絨綾羅春紬紡絲及玉器瑤瑯器磁器雕漆器文竹器又加賞貢使大班寫字人醫生哋嘸哋夷人跟役跟兵各有差○又奉聖諭據奏荷蘭國貢使搭坐商船來粵船商哋哋現已裝貨完畢放洋業據哋哋將入口出口船料稅銀等項全數交納荷蘭國貢使遠來納費恭順可嘉所有該貢使搭坐商船除進口貨物照例納稅外其應納船料及出口買帶貨物著加恩免其交稅今此項出口船料等稅業據全交著俟該貢使回國時仍令給還以示柔遠懷來至

意

意達里亞國

謹案明史外國傳作意大里亞今遵皇朝文獻通考作意達里亞

意達利亞居大西洋中自古不通中國明萬曆時泰西利瑪竇入中國卽其國人也其地周一萬五千里三面環海一面臨高山土田饒沃州郡繁多其最大者凡六城曰羅瑪曰勿搨祭亞曰彌朗曰納波里曰熱拏亞曰福楞察羅瑪城周一百五十里地有大渠曰地白里由城外百里入於海四方商船駢集於此萬曆二十九年利瑪竇入京師中官馬堂以其方物進獻自稱大西洋人禮部言會典止有西洋瑣里國無大西洋其眞僞不可知又寄居二十年方行進貢則與遠方慕義特來獻琛者不同但諸番

朝貢例有回賜其使臣必有宴賞乞給賜冠帶還國勿令潛居兩京與中
人交往別生事端不報已而帝嘉其遠來假館授粲給賜優厚利瑪竇遂
畱居不去四十四年禮科給事中余懋孳言自利瑪竇東來中國復有天
主之教畱都王豐肅陽瑪諾等煽惑羣眾不下萬人朔望朝拜動以千計
夫通番左道並有禁令公然夜聚曉散一如白蓮無爲諸教且往來濠鏡
與澳中諸夷通謀而所司不爲遣斥國家禁令安在帝納其言至十二月
命豐肅及龐迪我等俱遣赴廣東聽還本國久之遷延不行所司亦不爲
督發

國朝康熙九年六月國王阿豐肅遣部臣瑪訥撒爾達聶等奉表進貢金
剛石飾金劍金珀書籍珊瑚樹珊瑚珠琥珀珠伽楠香哆囉絨象牙犀角

乳香蘇合油丁香金銀乳香花露花幔花氈大玻璃鏡等物○得旨西洋地居極邊初次進貢具見慕義之誠可從優賞賚○尋遣瑪訥撒爾達聶等歸國行次山陽縣瑪訥撒爾達聶以病故加恩諭祭

康熙十七年八月阿豐肅遣陪臣本多白壘拉奉表貢獅子並奏言凡在西洋所屬瞻仰巍巍大清國咸懷尊敬願率諸國永遠沾恩等日月之無窮○聖祖仁皇帝召見於太和殿宴賚遣歸

康熙二十四年監督宜爾格圖奏言粵東向有東西二洋諸國來往交易係市舶提舉司徵收貨稅明隆慶五年以夷人報貨奸欺難於查驗改定丈抽之例按船大小以爲額稅西洋船定爲九等後因夷人屢請量減抽三分東洋船定爲四等國朝未禁海以前洋船詣澳照例丈抽但往日多

載珍奇今係雜貨今昔殊異十船不及一船請於原減之外再減二分東洋亦照例行○奉旨俞允

謹案康熙二十三年開海禁令廣東福建沿海民人許用五百石以下船隻出海貿易其海口內橋津舟車等物停止徵收是舊例丈抽已行議減是年因再酌減也西洋諸國以意達里亞爲首故載於此

雍正三年八月意達里亞國教化王伯納第多遣陪臣噶達都易德豐等表謝聖祖仁皇帝撫恤恩並賀世宗憲皇帝登極貢方物厚福水綠玻璃鳳壺里呵喇波囉盃蜜蠟盃蜜蠟小瓶瑤瑯小圓牌蜜蠟小刀柄銀壘絲四輪船小銅日規連銀壘絲瓶壘絲花水晶滿堂紅燈各寶玩器咖石噲鼻煙罐各色玻璃鼻煙壺各寶圓球各寶鼻煙壺銀壘絲大小花盤寶地

銀花盤連座銀纒絲船銀花匣連銀纒絲小花瓶鑲寶石花銀絲小漏盤
線花畫皮畫皮扇面畫繡花紙盤小銀罐花石片鐵花盤巴爾薩嗎油咖
石噲蓋盃鍍金皮規矩鑲牙片鼻煙盒銀花素鼻煙盒鑲銀花砂漏咖石
噲綠石鼻煙盒阿噶達片番銀筆咖石噲帶頭片瑪瑙刀柄瑪瑙鼻煙壺
各色石鞭頭小石盒珊瑚珠瑪瑙珠各寶素珠花紙盤香枕囊顯徽鏡石
頭火漆印把火字鏡玻璃棋盤棋子火漆大紅羽緞周天球鼻煙照字鏡
○使臣歸令齋勅諭其王曰朕纘承大統勉紹前徽王地處極遠特遣使
齋章陳奏感先帝之垂恩祝朕躬之衍慶周詳懇至詞意虔恭朕甚嘉慰
使臣遠來已加禮優待至西洋寓居中國之人朕以萬物一體爲懷教以
謹飭安靜果能慎守法度行止無愆自當推愛撫卹茲以爾使臣歸特頒

斯勅並賜粧緞錦緞大緞二十次緞四十王其領受悉朕惓惓之意又加賜國王貂皮人蔘洋漆器芽茶紙墨絹扇並文綺又奉旨其來使賜宴畢差司賓序班一人伴送至廣東該督撫差官護送出境

雍正四年六月初五日勅諭意達里亞國教化王覽王奏請援釋放德里格之例將廣東監禁之畢天祥計有綱一體施恩釋放等語查德里格於康熙五十九年因傳信不實又妄行陳奏我聖祖仁皇帝念係海外之人從寬禁錮及朕卽位後頒降恩詔凡情罪可原者悉與赦免開以自新德里格所犯與赦款相符故得省釋彼時廣東大吏未曾以畢天祥計有綱之案入大赦冊內具題上聞今據王奏請朕查二人所犯非在不宥之條卽王不行陳奏朕亦必察出施恩今特降旨與廣東大吏將畢天祥計有

綱釋放以示朕中外一體寬大矜全之至意茲因使臣回國再賜人淺貂皮等項用展朕懷王其收受故茲特諭

雍正五年又遣使貢方物大珊瑚珠寶石素珠金鑲咖石喻瓶金瑛瑯盒金鑲蜜蠟盒銀鑲咖石喻盒金鑲瑪瑙盒銀鑲藍石盒銀鍍金鑲雲母盒銀鍍金鑲玳瑁盒玻璃瓶貯各品藥露金絲緞金銀絲緞金花緞洋緞大紅雨毛緞大紅哆囉呢洋製銀柄武器洋刀長劍短劍鉞銀花火器自來火長鎗手鎗上品鼻煙石巴依瓦油聖多默巴爾撒木油璧露巴爾撒木油伯叻西理巴爾撒木油各品衣香巴斯第理葡萄紅露酒葡萄黃露酒白葡萄酒紅葡萄酒咖石喻各色瑛瑯料烏木鑲青石桌面烏木鑲黃石桌面烏木鑲各色石花條桌織成各種遠視畫

博爾都噶爾雅國

博爾都噶爾雅在歐邏巴極西境周七百里西濱大洋地分五道四方商船皆聚都城有大河曰德若經都城西入海通海大市凡六水泉二萬五千國有二學曰阨物辣曰哥應拔歐邏巴高士多出此學土產果實絲綿多水族善釀葡萄酒卽過海至中國不壞園囿有周數十里者禽獸充牣異國名王過其地往射獵焉俗有仁會恤孤寡犖獨商船至或有死而無主者收其行李訪其戚屬還之國王隨處遣官爲孤子治家長則還所有且加益焉明以前未通中國入本朝西洋諸部落向風內面雍正五年四月其國王名若望者遣陪臣麥德樂表貢方物○奉旨准其進獻○議准該國王感被德化特遣使臣不比尋常進貢所帶貢物令其水路來京其

來使從人願帶來者聽其帶來願畱粵者令該地方官從豐撥給房舍食物○世宗憲皇帝優加宴賚賜勅書於國王令麥德樂齋歸國○又奏准該國初次進貢遣內務府郎中一人同在京居住西洋人一人往迎來使至回國時送亦如之蓋異數也

乾隆十八年三月遣陪臣巴哲格等表貢方物命欽天監監正劉松齡前途導引至京召見巴哲格等賜宴並賜勅諭博爾都噶爾雅國王曰覽王奏並進方物具見悃忱洪惟我聖祖仁皇帝世宗憲皇帝恩覃九有光被萬方因該國王慕義抒誠夙昭恭順是以疊沛溫綸並加寵錫今王載遴使命遠涉重瀛感列聖之垂慈踵闕廷而致祝敬恭式著禮數彌虔披閱奏章朕心嘉悅旣召見使臣遂其瞻仰之願復親御帳殿優以宴賞之榮

西洋國人官京師者晉加顯秩慰王遠念茲以使臣歸國特頒斯勅其錫賚珍綺具如常儀加賜彩緞羅珍玩器具等物王其祇受悉朕眷懷○先是雍正五年朝貢於常賞外特賜國王人淺四十觔庫緞二十五匹磁器一百三十件洋漆器六十六件紙三百張墨二十匣字畫絹一百張及荔枝酒哈密瓜松糕茶糕芽茶香餅燈扇香囊等物又加賞來使倭緞磁器漆器紙墨扇等物至乾隆十三年又特賜該國王龍緞四匹粧緞花緞線緞各八匹百花粧緞十二匹綾紡絲各二十二匹羅十三匹杭紬七匹冊頁一付瑪瑙玉器六件瑤器二種漆器十九種磁器三十三種及紫檀木器畫絹香袋香餅紙墨扇茶又加賞正使畫絹紙墨扇茶及文綺又隨勅書賜國王龍緞片金各二匹蟒緞倭緞各三匹粧緞七匹花緞六匹閃

緞花緞青花緞藍緞青緞帽緞線緞各四匹綾紡絲各二十二匹羅十三匹絹七匹又因端陽節加賞國王紗四十四匹葛百匹香囊香串宮扇藥錠等物並正副使紗葛香囊香串藥錠等物蓋念其遠來從優錫予焉

粵海關志卷二十三

貢舶三

暎咭喇

暎咭喇一名英圭黎明史作丁機宜職方外紀作諳厄地海國聞見錄作英機黎蓋譯音無定字也其國在歐邏巴之西爲荷蘭屬國後漸富強與荷蘭爲敵國復占據北利未亞之地稱加那大暎咭喇而以歐邏巴之國爲本國距廣東界計程五萬餘里國中土地平衍宜麥禾果荳有一山名閒允產黑鉛民爲開採輸稅入官國人出入處左有那邨右有加釐皮申村皆設立礮臺二村中皆有大海駕船往來海邊多產火石王所居名蘭侖有城距村各百餘里王姓名世系遠者不可考其近者爲弗氏京也治

傳子昔斤京也治昔斤京也治傳子非立京也治

國朝康熙間始來通市後數年不復來至雍正七年以後互市不絕初廣東碣石鎮總兵官陳昂奏言臣徧觀海外諸國皆奉正朔惟紅毛一種奸宄莫測其中有英圭黎諸國種族雖分聲氣則一請飭督撫關部諸臣設法防範

乾隆七年十一月暎咭喇巡船遭風飄至澳門海面遣夷日至省城求濟廣東總督策楞令地方官優給賞糧修整船隻令俟風便歸國先是其互市處所或於廣或於浙二十二年部議暎咭喇不准赴浙貿易於是皆收泊廣東每夏秋交由虎門入口其土產則有大小絨嗶嘰羽紗紫檀火石及所製玻璃鏡時辰鐘表等物精巧絕倫二十四年方嚴絲斤出洋之禁

兩廣總督李侍堯奏言近年暎咭喇夷商屢違禁令潛赴寧波今絲斤禁止出洋可抑外夷驕縱之氣惟本年絲斤已收請仍准運還○奏入報可
是年暎咭喇夷商洪任輝妄控粵海關漏弊訊有徽商汪聖儀者與任輝交結擅領其國大班銀一萬三百八十兩按交結外國互相買賣借貸財物例治罪

乾隆二十七年暎咭喇夷商白蘭等求仍照前通市兩廣總督蘇昌請照東洋銅商搭配綉緞之例酌量配買○得旨每船准買土絲五千斤二蠶湖絲三千斤其頭蠶湖絲及綉綾緞疋仍如舊禁止不得影射取戾○自是暎咭喇來廣互市每船如額配買歲以爲常其明年并准帶綉緞成疋者二千斤

乾隆五十七年遣使請由天津入貢署總督巡撫郭世勳奏言外夷各國凡遇進貢俱由例准進口省分先將副表貢單呈明督撫奏奉允准之日委員伴送使臣齎帶貢物赴京呈進暎咭喇國歷來在廣東通商今欲赴天津進口該國王又無副表貢單臣等未敢冒昧遽行具奏○奉聖諭准其所請以遂其航海向化之誠卽在天津進口

乾隆五十八年入貢方物有天文地理音樂大表等凡二十九種特賜國王玉如意等品物十餘種賞正副使副使之子代筆官總兵官聽事官管船官等品物名有差又於如意洲賞正副使副使之子總兵官以下品物各有差八月十三日萬壽聖節使臣行慶賀禮於含青齋賞正副使副使之子品物各有差副使之子繪畫呈覽賞大荷包及通事總兵官等九員

品物各有差二十四日又於清音閣賞正使御筆書畫冊頁玉杯等品物有差副使副使之子通事總兵官等九員品物各有差二十九日於太和門頒給勅書賜該國王品物數十餘種又隨勅書賜國王品物數十餘種正使副使副使之子總兵官副總兵官二員通事管兵等官四員代筆醫生等官九員貢使從人九名貢船畱存管船官五名畱存貢船兵役水手共六百十五名品物各有差其時貢使在京呈請於直隸天津浙江等處貿易並懇賞給附近珠山小海島一處及附近廣東省城地方一處居住○奉旨以該貢使越例干瀆斷不可行○頒給該國王勅諭曰暎咭喇國王知悉爾國遠在重洋傾心嚮化特遣使恭齎表章航海來庭叩祝萬壽並備進方物用將忱悃朕披閱表文詞意肫懇具見爾國王恭順之誠深

爲嘉許所有齎到表貢之正副使臣念其奉使遠涉推恩加禮已令大臣帶領瞻覲錫予筵宴疊加賞賚用示懷柔其已回珠山之管船官役人等六百餘名雖未來京朕亦優加賞賜俾得普沾恩惠一視同仁至爾國王表內懇請派一爾國之人住居天朝照管爾國買賣一節此則與天朝體制不合斷不可行向來西洋各國有願來天朝當差之人原准其來京但既來之後卽遵用天朝服色安置堂內永遠不准復回本國此係天朝定制想爾國王亦所知悉今爾國王欲求派一爾國之人住居京城旣不能若來京當差之西洋人在京居住不歸本國又不可聽其往來常通信息實爲無益之事且天朝所管地方最爲廣遠凡外番使臣到京驛館供給行止出入俱有一定體制從無聽其自便之例今爾國欲畱人在京言語

不通衣服殊制無地可以安置若必似來京當差之西洋人令其一例改易服色天朝亦從不肯強人以所難設天朝欲差人常住爾國亦豈爾國所能遵行況西洋諸國甚多非止爾一國若俱似爾國王懇請派人畱京豈能一一聽許是此事斷難准行豈能因爾國王一人之請以致更張天朝百餘年法度若云爾國王爲照料買賣起見則爾國人在澳門貿易非止一日原無不加以恩視卽如從前博爾都噶爾亞意達里亞等國屢次遣使來朝亦曾以照料貿易爲請天朝鑒其憫忱優加體卹凡遇該國等貿易之事無不照料周備前次廣東商人吳昭平有拖欠洋船價值銀兩者俱飭令該管總督由官庫內先行動支帑項代爲請還並將拖欠商人重治其罪想此事爾國亦聞知矣爾國又何必派人畱京爲此越例斷不

可行之請況畱人在京距澳門貿易處所幾及萬里伊亦何能照料耶若云仰慕天朝欲其觀習教化則天朝自有天朝禮法與爾國不相同爾國所畱之人卽能習學爾國自有風俗制度亦斷不能效法中國卽學會亦屬無用天朝撫有四海惟勵精圖治辦理政務奇珍異寶並不貴重爾國王此次齎進各物念其誠心遠獻特諭該管衙門收納其實天朝德威遠被萬國來王種種貴重之物梯航畢集無所不有爾國之正使等所親見然從不貴奇巧並無更需爾國製辦物件是爾國王所請派人畱京一事與天朝體制既屬不合而與爾國亦殊覺無益特此詳晰開示遣令貢使等安程回國爾國王惟當善體朕意益勵款誠永矢恭順以保乂爾有邦共享太平之福除正副使臣以下各官及通事兵役人等正賞加賞各物

件另單賞給外茲因爾國使臣歸國特頒勅諭並賜賚爾國王文綺珍物具如常儀加賜綵緞羅綺文玩器具諸珍另有清單王其祇受悉朕眷懷特此勅諭○又勅諭曰暎咭喇國王知悉爾國王遠慕聲教嚮化維殷遣使恭賚表貢航海祝釐朕鑒爾國王恭順之誠令大臣帶領使臣等瞻觀錫之筵宴賚予駢蕃業已頒給勅諭賜爾國王文綺珍玩用示懷柔昨據爾使臣以爾國貿易之事稟請大臣等轉奏皆係更張定例不便准行向來西洋各國及爾國夷商赴天朝貿易悉於澳門互市歷久相沿已非一日天朝物產豐盈無所不有原不藉外夷貨物以通有無特因天朝所產茶葉磁器絲斤爲西洋各國及爾國必需之物是以恩加體恤在澳門開設洋行俾得日用有資並沾餘潤今爾國使臣於定例之外多有陳乞大

乖仰體天朝加惠遠人撫育四夷之道且天朝統馭萬國一視同仁卽廣東貿易者亦不僅爾暎咭喇一國若俱紛紛效尤以難行之事妄行干瀆豈能曲循所請念爾國僻居荒遠間隔重瀛於天朝體制原未諳悉是以命大臣等向使臣等詳加開導遣令回國恐爾使臣回國後稟達未能明晰復將所請各修繕勅逐一曉諭想能領悉據爾使臣稱爾國貨船將來或到浙江寧波珠山及天津廣東地方收泊交易一節向來西洋各國前赴天朝地方貿易俱在澳門設有洋行收發各貨由來已久爾國亦一律遵行多年並無異語其浙江寧波直隸天津等海口均未設有洋行爾國船隻到彼亦無從銷賣貨物況該處並無通事不能暗曉爾國語言茲多未便除廣東澳門地方仍准照舊交易外所有爾國買賣人要在天朝京

城另立一行收貯貨物發賣倣照俄羅斯之例一節更斷不可行京城爲萬方拱極之區體制森嚴法令整肅從無外藩人等在京城開設貨行之事爾國向在澳門交易亦因澳門與海口較近且係西洋各國聚會之處往來便益若於京城設行發貨爾國在京城西北地方相距遼遠運送貨物亦甚不便從前俄羅斯人在京城設館貿易因未立恰克圖以前不過暫行給屋居住嗣因設立恰克圖以後俄羅斯在彼處交易買賣卽不准在京城居住亦已數十年現在俄羅斯在恰克圖邊界交易與爾國在澳門交易相似爾國既有澳門洋行發賣貨物何必又欲在京城另立一行天朝疆界嚴明從不許外藩人等稍有越境攙雜是爾國欲在京城立行之事必不可行又據爾使臣稱欲求相近珠山地方小海島一處商人到

彼卽在該處停歇以便收存貨物一節爾國欲在珠山海島地方居住原爲發賣貨物而起今珠山地方旣無洋行又無通事爾國船隻旣不在彼停泊爾國要此海島地方亦屬無用天朝尺寸俱爲版籍疆址森然卽島嶼沙洲亦必畫界分疆各有專屬況外夷向化天朝交易貨物者亦不僅爾暎咭喇一國若別國紛紛效尤懇請賞給地方居住買賣之人豈能各應所求且天朝亦無此體制此事尤不便准行又據稱撥給附近廣東省城小地方一處居住爾國夷商或准令澳門居住之人出入自便一節向來西洋各國夷商居住澳門貿易畫定住址地界不得逾越尺寸其赴洋行發貨夷商亦不得擅入省城原以杜民夷之爭論立中外之大防今欲於附近省城地方另撥一處給爾國夷商居住已非西洋夷商歷來在澳

門定例況西洋各國在廣東貿易多年獲利豐厚來者日眾豈能一一給撥地方分住耶至於夷商等出入往來悉由地方官督率洋行商人隨時稽察若竟毫無限制恐內地民人與爾國商人間有爭論轉非體恤之意覈其事理自應仍照定例在澳門居住方爲妥善又據稱啖咭喇國夷商自廣東下澳門由內河行走貨物或不上稅或少上稅一節夷商貿易往來納稅皆有定則西洋各國均屬相同此時自不能因爾國船隻較多征收稍有溢額亦不便將爾國上稅之例獨惟減少惟應照例公平抽收與別國一體辦理嗣後爾國夷商販貨赴澳門仍當隨時照料用示體恤又據稱爾國船隻請照例上稅一節粵海關征收船料向有定例今既未便於他處海口設立交易自應仍在粵海關按例納稅毋庸另行曉諭至於

爾國所奉之天主教原係西洋各國向奉之教天朝自開關以來聖帝明王垂教創法四方億兆率由有素不敢惑於異說卽在京當差之西洋人等居住在堂亦不准與中國人民交結妄行傳教尤屬不可以上所諭各條原因爾使臣之妄說爾國王或未能深悉天朝體制並非有意妄干朕於入貢諸邦誠心向化者無不加之體恤用示懷柔如有懇求之事若於體制無妨無不曲從所請況爾國王僻處重洋輸誠納貢朕之錫予優加倍於他國今爾使臣所懇各條不但與天朝法制攸關卽爲爾國代謀亦俱無益難行之事茲再明白曉諭爾國王當仰體朕心永遠遵奉共享太平之福若經此次詳諭後爾國王或誤聽爾臣下之言任從夷商將貨船駛至浙江天津地方欲求上岸交易天朝法制森嚴各處守土文武恪遵

功令爾國船隻到彼該處文武必不肯令其停畱定當立時驅逐出洋未免爾國夷商徒勞往返勿謂言之不預也其凜遵毋忽特此再諭○並諭署總督郭世勳密行防範毋任潛行佔住○郭世勳覆奏言暎咭喇夷人貿易廣東歷年既久目睹西洋夷商居住澳門未免心生歆羨且同一夷人而暎咭喇國人投澳居住必向西洋人出租賃屋形勢儼成主客是以籲請賞給附近一地方以爲收存貨物之地與西洋人澳門相埒溯查西洋人住澳已二百餘年已往者不必驅之使去暫寄者豈可許其常畱況廣東附近各處濱臨海洋尤不容任聽外國夷人紛投錯處誠如聖諭海疆一帶戒備宜嚴欽此欽遵辦理再查夷人到廣不在澳門居住卽在黃埔泊船往來出入俱由該管官給票照驗不容任意行走現在密飭地方

官嚴行查察倘有洋行通事引水及地方無籍之徒串通該夷人詭圖佔住卽密行拏究

是年十二月二十五日奉聖諭朱珪奏嘆咭喇國呈進表貢一摺該國王因前年貢使進京賞賚優渥特具表文土物呈進具見惻忱雖未專使來粵有何不可已准其賞收並發給勅書一道及賞賜緞疋等件朱珪接到後可卽交與該國大班波啣轉送回國俾該國王益加感戴恭順以示懷柔至天朝官員例不與外夷交際其致送前任總督監督禮物朱珪飭令寄回所辦是

嘉慶元年進貢黃色新樣大呢等物

嘉慶九年十二月總督倭什布等會奏言嘆咭喇國王表稱與哷囉晒國

爭鬪及哂嘯晒國有著人到中國謠言疎閒等語查嘉慶七年八月閒有在澳居住之夷目倭黎哆寄信與在京居住之西洋人索德超言嘆咭喇國有大戰船六隻相近澳門停泊恐有覬覦澳門情事轉呈管理西洋堂大臣蘇楞額具奏奉諭旨查詢經前督臣吉慶查明嘆咭喇國護貨兵船均已陸續回國其在澳門外灣泊時並未滋事因該國向來恃強住澳夷人是以驚疑貿易夷船嘆咭喇國貨物最細較別國買賣殷厚該國夷目夷商均稱恭順因與哂嘯晒蠻觸相爭恐爲離閒有妨貿易故於表內特陳其事再據該夷目稟稱該國宰相囉咖嘑哩有寄呈天朝中堂書一封總督書一封并禮物各一分又該國公班理事官啣吡啞有寄呈總督關部書一封呈關部禮物一分當諭以該國王表貢不敢壅於上聞必據情

轉奏至寄呈書信禮物天朝國法森嚴大臣官員不准與番國交接不但中堂書信禮物不便轉寄卽我等亦不便接閱收受令其毋庸呈出遇便帶回本國○奉聖諭據倭什布等奏嘆咭喇國呈進表貢請旨遵行一摺該國王重譯諭誠情詞恭順從前乾隆六十年間曾經附進表貢蒙皇考高宗純皇帝俯賜賞收加以錫賚賜之勅書此次既據該國王備進方物自應照例賞收著那彥成等查照辦理並將貢品齎京呈遞再行頒給勅書賞件俾遂愜忱而示懷柔至另片所奏該夷目稟稱該國宰相有寄呈天朝中堂書總督書一封禮物各一分又該國公班理事官寄呈總督關部書各一封呈關部禮物一分業據倭什布等以天朝法制大臣官員不准與外番交接諭令毋庸呈出帶回本國等語所辦甚是但外番呈進表

貢例由總督關差轉奏寄書通問尙屬有因至寄呈天朝中堂之書必係該國王因從前進貢時知有和坤在朝且管理西洋堂事是以此次專函備禮看來所寄之書未必係徧致大學士公函現在倭什布等已將原信發還不妨向該夷目等將該國所寄中堂之書究係寄與何人之處訊問明晰遇便覆奏至該國與佛喇哂國構釁興兵不過蠻觸相爭儘可置之不問惟所稱有護貨兵船四隻來廣一節近聞外洋商船到粵均有兵船護送亦不獨嘆咭喇國爲然必係因洋面不能肅清自爲守衛之計迨駛至澳門已近內地口岸或有竊掠之事豈不貽笑外夷該督等當嚴飭地方文武整飭巡防使澳門一帶商船停泊得以安靜無虞至伊等護貨兵船向來必有灣泊處所總當循照舊規勿令任意越進爲要再閱譯出該

國原表內稱有別項事情要我出力我亦十分歡喜效力等語此言似非無因自係聞洋面時有盜警或需伊國兵力幫同緝捕是以隱踴其詞洋海地面番舶往來原應內地官兵實力查緝焉有借助外藩消除奸匪之理那彥成到任後惟當遵照節次諭旨修明武備整頓營伍使奸徒聞風自遠以懾外夷而靖海疆方爲不負委任○旋經總督那彥成監督延豐奏言臣等欽遵諭旨傳諭夷目諭以該國王呈進表貢業荷大皇帝賞收併諭以大皇帝君臨萬國恩被四表無論內地外夷均係大皇帝百姓卽如汝國鐘表大呢羽毛等物原非中國必需之物所以准汝國貿易通商者皆出大皇帝垂憐外夷子民一視同仁之恩此次汝國王恭進表貢大皇帝鑒汝等恭順之心諭令賞收諭令我等大人們好生恩待汝等併管

東內地商人平允交易汝國來此貿易之人亦須安分謹遵禁令毋得有違將進到表貢委官恭送進京再降恩旨至汝國王子大臣等與中國中堂大人們書信禮物天朝法度森嚴大臣從無外交之事汝等帶來禮物斷不必送出惟所帶書信必須交出我大人們也不敢私自拆閱將原封恭呈大皇帝御覽再請發回至汝國管理貿易頭人不過專爲汝國貿易事務並無別項面見稟議事件只須在此好好管束汝國之人不得違禁生事自來中國大人從無私謁私見之例我大人們謹遵大皇帝恩旨體恤夷商管教內地民商公平貿易汝等須知天朝法度感大皇帝之恩等語明白曉諭該夷目等人歡抃叩頭感服伏查外洋各國夷人見小圖利中國布帛茶葉等物亦其日用急需各夷又互相蠻觸是以生恐別夷

國聞其往來貿易其書信因從前未經收受是以帶回澳門今臣等明白宣諭伊等呈出原封書信禮單臣等又將副本令人譯出清稿一併呈覽查各國洋船向來灣泊均有一定處所澳門離省三百餘里係西洋夷人常川居住向止准西洋夷船二十五隻更替貿易其餘各國夷船例應收泊黃埔欲收泊黃埔必須先進虎門虎門離省一百六十里山岸陰沙自然天險其護貨兵船祇准在虎門外之潭仔零丁等洋面灣泊而黃埔虎門潭仔零丁等處層層礮臺常川均有兵船巡防該夷船收埔時臣等兩衙門仍派武弁關役彈壓稽查立法極爲周備至各國夷船俱無兵船惟暎咭喇國貨船有兵護送而該國商船亦無兵船惟其國王貨船始有兵船四隻護送其兵船在虎門外交易後隨同貨船回國不准少有匿遷其

餘各夷國貨船內均有礮火器械自資防範於例原准攜帶至該國原表稱歡喜效力等語隱躍其詞誠如聖諭自係聞洋面不靖或需伊等出力之意查夷人不過沾沾計利卽如上年澳門夷目願備兵船二隻幫同師船出洋緝捕臣延豐卽以體制不符且不能得力與倭什布議以後停止夷船協捕而此二隻洋船迄今無蹤亦實無遭風失事等事細揣其情形不過藉協捕爲名可以免此二船出入納稅而暎咭喇國自亦得聞此事希冀效尤免稅又恐澳門夷船出力有功或待彼國冷淡其意不過如此至各該國夷船船隻旣大多載礮火向來洋盜俱不敢搶劫澳門等要處又有師船巡防不敢少有疏失可以毋塵聖念○奉聖諭那彥成等覆奏暎咭喇國呈進貢表一摺覽奏俱悉暎咭喇獻表輸誠呈進方物前已降

旨加恩賞收現在那彥成等奏明專員齎京俟到京時頒給勅書賞件用示懷柔至摺內稱澳門夷目願畱兵船協同緝捕之處延豐以體制不符且不能得力與倭什布商議停止所見甚是緝捕洋匪內地自有兵船豈有天朝藉資外夷之理且安知伊等不窺探虛實因此生其輕視之心乃倭什布三義助上年於夷船請往協捕時冒昧允准今該夷船已查無蹤跡可見並非認真出力那彥成延豐能見及此較之倭什布三義助有識多矣至各國洋船向來灣泊既有一定處所自當仍循其舊那彥成等自當督率所派員弁隨時畱心稽查彈壓勿稍疎懈又據覆奏譯出嘆咭喇貢使所帶該國宰相寄呈天朝中堂大人書信一節那彥成等諭以禮物不必送出惟所帶書信必須交出我們也不敢私拆將原封呈覽等語此

語甚是但看所譯寄與天朝中堂書信其語氣似專向一人而言並非公
信那彥成等當再加以詢問究竟書內所指中堂係屬何人若該使臣係
寄呈天朝中堂之公信則當明白告知以總督關部俱駐劄粵省經管各
國夷船爾國等寄呈書信尙無不合至於天朝大學士不止一人皆隨大
皇帝在朝辦事從無外交爾國宰相不應寄呈書函禮物此後不必再有
呈遞那彥成等詢問時看該使臣如何登覆著隨時具奏○又經總督那
彥成奏言據該夷目覆稱本國僻處重洋不知天朝有幾位中堂亦不知
中堂名姓以不過照常辦理是以所寄書函並無專指等語○奉硃批覽
嘉慶二十一年署總督董教增會奏嘆咭喇貢使請由浙江舟山洋面赴
天津入貢旋因貢使禮儀未暗勅令該貢使由粵回國將貢物領回仍免

其回國茶葉等貨稅銀一萬六百八十兩旋經蔣攸銛奏請該國貨船准其仍在廣東貿易不得駛往他處致干驅逐以昭天朝懷遠恩施○奉聖諭董教增等奏嘆咭喇國遣使入貢一摺嘆咭喇國納費輸誠情詞恭順自應准其入貢其貢船由天津登岸現已降旨諭知那彥成廣惠妥協辦理該撫等因天津等處口岸無熟悉夷情之人飭商選派諳曉夷語夷字者二人分送直隸浙江督撫衙門以備繙譯之用辦理甚爲周妥至該國王所遣夷官咖啦噠禮現在粵東省城該撫卽傳諭該夷官以爾國王輸誠納貢業經奏明大皇帝仰蒙允准爾國貢使到京定邀恩賚其夷官先行照例遣回本國可也

是年七月奉聖諭此次嘆咭喇國貢使不遵禮節是以降旨卽日遣回但

念該使臣雖有失禮之愆該國王萬里重洋奉表納貢其意至爲恭順未便絕之已甚轉失字小之意因將該國王貢品內擇其至輕微者地理圖四張畫像二張銅板印畫九十五張加恩賞收仍賞該國王白玉如意一枝翡翠玉朝珠一盤大荷包二對小荷包八箇交該貢使領回以示厚往薄來之意該貢使等領到賞件極爲欣感亦頗形悔懼現已自通州啓程俟到粵後著蔣攸銛等仍照例給與筵宴一次並諭以爾等福分淺薄已至宮門不能仰瞻天顏大皇帝憐念爾國王慕化輸誠仍酌收貢件並賞爾國王貴重品物爾等應感天恩迅速回國俾爾國王敬悉恩意其未收貢件均妥爲照料上船勿令損失倘曉諭之後該貢使等復將未收貢件懇乞賞收總以業經奉有明旨不敢瀆請正言拒絕○又勅諭暎咭喇國

王曰爾國遠在重洋輸誠慕化前於乾隆五十八年先朝高宗純皇帝御極時曾遣使航海來廷維時爾國使臣恪恭成禮不愆於儀用能仰承恩寵瞻覲筵宴錫賚便蕃本年爾國王復遣使齎奉表章備進方物朕念爾國王篤於恭順深爲愉悅循考舊典爰飭百司俟爾使臣至日瞻覲宴賚悉倣先朝之禮舉行爾使臣始達天津朕飭派官吏在彼賜宴詎爾使臣於謝宴時卽不遵禮節朕以遠國小臣未嫻儀度可從矜恕特命大臣於爾使臣將次抵京之時告以乾隆五十八年爾使臣行禮悉跪叩如儀此次豈容改異爾使臣面告我大臣以臨期遵行跪叩不敢愆儀我大臣據以入奏朕乃降旨於七月初七日令爾使臣瞻覲初八日於正大光明殿賜宴頒賞再於同樂園賜食初九日陛辭並於是日賜遊萬壽山十一日

在太和殿頒賞再赴禮部筵宴十二日遣行其行禮日期儀節我大臣俱已告知爾使臣矣初七日瞻覲之期爾使臣已至宮門朕將御殿爾正使忽稱急病不能動履朕以正使猝病事或有之因祇令副使入見乃副使二人亦同稱患病其爲無禮莫此爲甚朕不加深責卽日遣令歸國使臣旣未瞻覲則爾國王表文亦不便進呈仍由爾使臣齎回但念爾國數萬里外奉表納贄爾使臣不敬恭將事代達悃忱乃爾使臣之咎爾國王恭順之心朕實鑒之特將貢物內地理圖畫像山水人像收納嘉爾誠心卽同全收並賜爾國王白玉如意一柄翡翠玉朝珠一盤大荷包二對小荷包八箇以示懷柔至爾國距中華遙遠遣使遠涉良非易事且來使於中國禮儀不能諳習重勞唇舌非所樂聞天朝不寶遠物凡爾國奇巧之器

亦不視爲珍異爾國王其輯和爾人民慎固爾疆土無閒遠邇朕實嘉之嗣後毋庸遣使遠來徒煩跋涉但能傾心效順不必歲時來朝始稱向化也俾爾永遵故茲勅諭

謹按嘆咭喇向由粵省入貢故按年詳載至其駛入澳門事蹟則分載夷商門以免牽混

琉球國

琉球土音屋其惹在福建泉州府東海島中魏晉以前不著於史明代始內向服屬事具明史

國朝順治三年遣使者至京禮部言前朝勅印未繳未便授封至十一年遣王舅馬宗毅大夫蔡祚隆等來貢兼繳前朝勅印請封命兵科副理事

官張學禮充正使行人司行人王垓充副使齎詔印往封令二年一貢貢道由福建亦無至粵貿易者

嘉慶十五年因貢船遭風收泊粵洋惠來縣神泉司香黃澳洋面當將表文貢品使臣官伴官生人等送閩仍由故道入京

粵海關志卷二十四

市舶

臣謹按明時泰西利瑪竇進萬國圖分天下爲五大州一曰亞細亞二曰歐邏巴三曰利未亞四曰亞墨利加五曰墨瓦臘泥加其後艾儒略因之爲職方外紀雖其說近於夸誕然明列爲圖實指其地似亦非全無依據者竊以爲前史所載外域大都闕於方隅是以有明中葉尙不知有大西洋其栖泊島嶼之國更無論矣國家當頓紘壹軌之際九譯來王見聞倍確卽今市舶所集若暹羅若呂宋若薊喇若噶喇巴則亞細亞州之地也若荷蘭若意達里亞若暎咭喇則歐邏巴州之地也若加那大暎咭喇若咪喇嚟則利未亞之地也此誠韓愈所謂東南際天

地以萬數者莫不瞻星戴斗會極朝宗裒而錄之亦以見我聖天子無外之量有以包函而覆幬之焉爾

呂宋國

呂宋居南海中在臺灣鳳山沙馬崎東南至廈門水程七十二更或曰卽意氏班牙海國聞見錄作是班牙爲呂宋之祖家也其國北面高山遠視若鋸齒俗曰宰牛坑山有土番屬於呂宋閩人以其地富饒商販者數萬人往往久居不返至長子孫俗淳樸無爭訟出入佩刀自衛亦時禮佛誦經父子兄弟不同寢席晨昏鳴鐘嚴夜禁黃昏張燈火成市明洪武五年遣使偕瑣里諸國入朝永樂三年遣官齎詔撫諭其國八年與馮嘉施蘭入貢自後久不至萬曆四年明兵追海寇林道乾至其國國人助討有功

復朝貢國中有機易山產金銀傳聞樹生金豈有中國奸民望風滋擾欲往採呂宋拒不納而佛郎機者素與互市久之見呂宋弱可取乃奉厚賄遺王乞地如牛皮大建屋以居王不虞其詐而許之其人乃裂牛皮聯屬至數千丈圍呂宋地乞如約王大駭然業已許諾無可柰何遂聽之而稍征其稅如國法其人既得地則營室築城列火器設守禦具爲窺伺計已竟乘其無備襲殺其王逐其人民而據其國仍名呂宋其實佛郎機人也呂宋大山從宰牛坑延繞東南至利仔反水程十二更又南至甘馬力水程二十一更隔海對峙有五島曰班愛曰惡黨曰速巫曰貓務曰烟島各有王人家無所蓄其東南又有萬老高人物土產俱與呂宋相類職方外紀言呂宋產一鷹王又言有一樹百獸不得近之一過其下卽斃似近妄

誕云

國朝崇德中呂宋遣使貢於明使臣畱闈未還至順治三年福建平守臣送其使入朝四年六月世祖章皇帝賜以服物賜勅諭於其王遣歸本國康熙五十五年奉聖諭大學士等曰朕訪聞海外有呂宋噶喇巴兩處地方噶喇巴乃紅毛國泊船之所呂宋乃西洋泊船之所彼處藏匿盜賊甚多內地之民希圖獲利往往於船上載米帶去並賣船而回甚至有畱在彼處之人不可不預爲措置也次年定制禁止商船往南洋呂宋噶喇巴等處貿易

康熙五十七年兵部議覆兩廣總督楊琳疏言據原任碣石總兵官陳昂條奏臣詳察海上日本暹羅廣南噶喇巴呂宋諸國形勢東海惟日本爲

大其次則琉球西則暹羅爲最東南番族最多如文萊等數十國盡皆小邦惟噶喇巴呂宋最強噶喇巴爲紅毛市舶之所呂宋爲西洋市舶之所而紅毛一種奸宄莫測其中有英圭黎干絲蠟和蘭西荷蘭大小西洋各國名目雖殊氣類則一惟和蘭西一族兇狠異常且澳門一種是其同派熟悉廣省情形請令督撫關差諸臣設法防備或於未入港之先查取其火礮方許進口或另設一所關束夷人每年輪流貿易不許多船並集查外國夷商利與中國貿易而夷商憎服有素數十年來沿習相安應聽其照常貿易將該總兵所請查取火礮另設一所關束輪流貿易之處無庸議請於夷船一到之時令沿海文武官弁晝夜防衛使其憎服無致失所應如所請○奉旨俞允

雍正五年開洋禁○奉諭旨昔年聖祖仁皇帝諭旨海外噶喇巴呂宋藏匿盜賊甚多內地之民往往畱在彼處隨經廷臣與閩廣督撫議令內地之人畱在外洋者附洋船帶回准行在案此乃聖祖仁皇帝綏靖海疆且不忍令內地之民轉徙異地實仁育義正之盛心也但數年以來附洋船而回者甚少朕思此輩多係不安本分之人若聽其去來任意伊等益無顧忌輕去其鄉而飄流外國者益眾矣嗣後應定期限若逾限不回是其人甘心流移外方無可憫惜朕亦不許令其復回如此則貿易欲歸之人不敢稽遲在外矣將此交與高其倬楊文乾常賚悉心酌議並如何定例年月之處一併詳議具奏○尋議康熙五十六年定例出洋貿易人民三年之內准其回籍其五十六年以後私去者不得徇縱入口久已遵行在

案又現住外洋之船或去來人數不符或年貌互異者卽係頂替私回應嚴飭守口官於洋船回時點對照票細加稽查如有情弊將船戶與守汛官員分別治罪至閩粵洋船出入總在廈門虎門守泊嗣後別處口岸概行嚴禁○得旨康熙五十六年定例之人隨據福建等省奏報回籍者幾及二千餘人是出洋之人皆已陸續返棹而存畱彼地者皆甘心異域及五十六年以後違禁私越者也方今洋禁新開禁約不可不嚴以免內地民人貪冒飄流之漸其從前逗遛外洋之人不准回籍餘依議

雍正十三年正月福建提督王郡言呂宋國以麥收歉薄附洋船載穀二千石銀二千兩海參七百觔來廈賣銀糴麥多則三千石少則二千石臣查五穀出洋律有明禁可否准以穀易麥候欽定○得旨朕統御寰區內

外皆爲一體呂宋雖隔重洋朕心並無歧視著該督撫提督等轉飭有司按照穀麥時價均平糶糴不許內地之人抑勒欺詐俾番船載麥回國以濟其用并將朕旨傳諭來商知之

乾隆十八年六月呂宋番官龍番教魯那羅船被風飄入內地照例支給口糧護送歸國

乾隆四十九年進口貿易

小呂宋國

小呂宋卽是班牙西北臨大洋東南俯中海西鄰葡萄牙東北接佛郎機乾隆六十年總督長麟巡撫朱珪監督舒璽諭澳門口委員等查乾隆五十二等年因米價昂貴經前總督孫士毅飭令商民人等如有挾貲赴

外洋糴濟及自行專載米石到粵者均免其輸納船鈔現值省城米價昂貴自應援照辦理查小呂宋爲產米之區其程途又較別國最近一帆直達可以計日往還除另飭委員傳諭大班運濟外合就飭知遵照免其輸納船鈔以示招徠

嘉慶十一年小呂宋及暎咭喇之孟雅拉皆運米進口

道光十二年十一月布政司會詳稱奉總督廬坤札開粵東產米無多向藉西省接濟至雍正乾隆嘉慶年間遇有外洋貨船載米來粵者寬其貨稅道光四年復經前總督阮元奏請運米夷船無夾帶貨物者進口特免其丈輸船鈔凡所以廣招徠而裕民食也近年以來夷船歲至洋米未見有餘是否管口押船人役有暗中加索規費致令夷販不前或亦囤戶把

持查夷商貿易洋商專任其事自應著落該洋商查明釐剔設法招徠俾洋米源源而來柔遠便民所裨不淺札司即便會同臬運二司督糧道查明妥議詳候覈飭遵照卽諭洋行總商限日議覆茲據洋商稟稱夷船載米來粵其米多產自小呂宋亦有由噶喇吧埠頭裝載來者凡裝米來粵之各國夷船均係各由本國駛船前往小呂宋等處買米裝載來粵該處市價每百觔洋銀或一圓一二毫或一圓三四毫不等總以價在一圓五毫之內各米船裝米每船多者不過四五千石少者止二三千石在六七千石以上者頗少查道光十年分各國共入口米船一十五隻共裝米五百九十六萬五千餘觔洋穀一百二十二萬四千餘觔二共七百一十八萬九千餘觔又道光十一年分各國共入口米船一十七隻計裝洋米六

百九十二萬五百餘觔洋穀九十二萬八千餘觔二共七百八十四萬九千餘觔本年十一月二十日以前共計入口米船二十九隻共裝米一千二百二十六萬四千零十五觔洋穀一十五萬零一百餘觔二共一千二百四十一萬四千一百餘觔以前兩年比較則米船米石進口年多一年今年又多至十餘隻似無因有弊端致令夷販不前之事洋米來自夷洋因受海風潮氣每易霉壞不能囤貯日久似尙無囤積把持之弊再查洋米船隻入口已於道光四年奏定免征船鈔出口時向有大關征收放關銀共五百一十四兩八錢四分八釐糧道衙門征收放關銀一百一十六兩四錢二分四釐二共放關銀六百三十一兩二錢七分二釐事涉關政且係帑款商等未取輕議等語本司道等伏查粵東民食向藉西省接濟

原不全需洋米但西穀貴賤豐歉不常不能必其年年價賤而到多至洋米價值極貴之時猶較少於內地極賤之數若使源源而至雖西穀偶缺亦可恃以無虞且洋米產自小呂宋噶喇巴二處不過一隅之地興販亦只港腳花旗諸國至關稅自有暎咭喇呢羽洋布各貨爲大宗米舶雖多斷無損於稅額惟向來洋米到省設使任洋行全數畱貯恐市價或致增昂今只暫畱一半聽候官用仍有一半流通且操縱在官市儉雖欲把持而無所施其技應請如該商等所議自後洋米入口每船由洋行存畱一半以二萬石爲率其發賣存畱數目每季由洋行報知南海縣轉報院司道府各衙門查照統歸糧道衙門經理洋行承受洋米不准標價搶買并請移咨海關衙門放關銀兩照例征收倘有管口押船人役暗中加索規

費隨時查究懲辦

吡喇喇國

吡喇喇卽小呂宋其地宜稻米賤時石值三四錢卽昂貴亦不過一兩遇風便十日可至澳門

米時哥國

米時哥亦呂宋屬國其地多鑄花邊錢無物產海舶至粵者惟載銀錢而已

噶喇巴國

噶喇巴本爪哇故地巫來由種也後屬荷蘭國在南海中由萬山外羅新州繞陸耐國後向南行約四日至崑崙山爲安南境又南行約五日至柔

佛國又南行一日至網甲峽口又過三洲洋正南行三日爲噶喇巴山名頭峙山又南行二十餘里至海峙山過此爲噶喇巴大山廣袤二百餘里有城郭荷蘭番在此約三四千人別有烏番兵二三千人明時諸番互市其國未嘗一至其地產燕窩麝香丁香沉香落花生蔗糖咖噠流連子形如柚而小孟姑生形似柿有核其味清美

謹按噶喇巴爲巫來由種巫來由者莽均達老國也地在東南海中雍正七年以後嘗入中國通市恭載皇朝通考而海國聞見錄以噶喇巴有土番無來由種謂俗以外番之無可考者爲巫來由其誤甚矣

國朝初年噶喇巴始與呂宋蘇祿等通商閩海閩廣閒人浮海爲業者利其土產率潛處番地逗遛不返康熙五十六年以噶喇巴口岸多聚漢人

恐侵長海盜禁止南洋往來其在外人民不得復歸故土嗣奉恩旨凡五十六年以前出洋民人限三年回籍然亦尙有畱者雍正五年弛海禁嗣後通市不絕乾隆元年閩督郝玉麟復奏准自康熙五十六年例禁後私去者不准歸國其例前之民願歸者應聽自便初噶喇巴爲荷蘭人所占委夷目鎮守更代皆聽荷蘭之命漢人居之者以數萬計生長其地曰上生仔司漢人貿易者曰甲必丹人有罪則徙之西隴西隴在西洋中距噶喇巴遠甚荷蘭舊國所屬地也六年閏六月爲羣番所擾荷蘭力不勝遣罪人禦之許立功後令還噶喇巴罪人奮勇效命戰屢捷羣番爲之退卻荷蘭卽有立功贖罪之令又慮遣還罪人則西隴孤弱一再令噶喇巴調無辜漢人往代時有甲必丹連富者以漢人在此貿易惟領票輸銀無調

取之例不受命番目拘之被獲者先後不勝計於是漢人大恐鳴金罷市番目怒舉火鳴礮相攻殺傷頗多署福建總督策楞提督王郡聞於朝○策楞又奏言被害漢人久畱番地屢邀寬宥之恩而自棄王化按之國法皆干嚴譴今被其戮殺多人事屬可傷實則孽由自作但噶喇巴以地隔重洋恃其荒遠罔知顧忌肆行殘害恐嗣後擾及商舶請禁止南洋商販俾知畏懼俟革心向化再爲請旨施恩○又廣東道監察御史李清芳奏言商人往東洋者十之一南洋者十之九江浙閩廣稅銀多出於此一加禁遏則四省海關稅額必至於缺每年統計不下數十萬其有損於國帑一也大凡民間貿易皆先時而買及時而賣預爲蓄積流通不窮今若一旦禁止商旅必至大困二也應暫停噶喇巴貿易俟其哀求然後再往至

南洋各道不宜盡禁○奏入高宗純皇帝令江浙閩廣督撫詳查議奏○
嗣兩江總督德沛浙閩總督那蘇圖署福建總督策楞兩廣總督慶復皆
遵旨議奏王大臣會同兵部奏言臣等查各督撫所議或請毋庸禁止南
洋商販或請暫禁噶喇巴往來雖所議不同其大意皆以仰體皇上懷柔
無外之盛心令海外遠夷悔過自新均霑德澤卽議令暫禁噶喇巴者原
欲使其畏懼今聞噶喇巴已將夷目黜責於我船返棹時加意撫慰護送
囑令再往並無擾及商客之意宜仍准其通商爲便○奏入得旨俞允
乾隆十五年四月閩督喀爾吉善等奏言龍溪縣民陳怡老久居噶喇巴
貿易娶夢噶適番女高冷爲妾賄通夷目謀充甲必丹於十四年五月潛
回廈門爲地方官訪獲以聞○照例遠遣

乾隆二十四年禁絲斤出洋二十七年復弛嘆咭喇瑞噠諸國之禁而南洋噶喇巴諸國飭禁如故

二十九年十二月廣督李侍堯等奏言噶喇巴諸國仰望殊恩懇將上絲及二蠶粗絲准一體酌帶其數應以一千六百斤爲率時江南督撫亦以爲請懇嚴立限制不使外番求售無厭或致市價加昂○奏入報可○由是南洋諸國皆得衣被聖朝章采奉職彌謹云

瑞國

瑞國在西北海中達廣東界俱係海洋計程六萬餘里國中土地平衍有大山三一曰庇高天牙禮花閣三四年輒有光燭天望之若烟火四面巖巖壁立千仞人跡不能到一曰布農故巴黎自山麓達於頂俱白沙童然

無一草一木一日化倫仕高勞華山中產紅銅民爲開採納於王王所居
土名仕的哥盧國人會聚之地土名乙頓巴黎距王居七百餘里國中四
面皆大澤汪洋千頃國人之散處者非駕船不能往來乙頓巴黎蓋泊船
總匯處也凡大市鎮當國人貿易之期則有官司至若古司市者故市鎮
皆設館舍以供駐宿置班衙以供使令其人信奉天主教同暎咭喇通市
始自雍正十年後歲歲不絕每春夏之交其國人以上產黑鉛粗絨洋酒
葡萄乾諸物來廣由虎門入口易買茶葉瓷器諸物至初冬回國乾隆二
十七年特旨准配買絲斤是年十月瑞國商棉是坦等呈稱夷等外洋各
國雖有絲斤不諳織作以不能自織之國若止准帶絲斤仍屬無由服用
現在瑞國已缺乏紬緞二三年懇先准帶紬緞成疋者二千斤由兩廣總

督蘇昌代奏并請嗣後每絲千斤止准帶紬緞八百斤毋得額外多求至現在瑞國懇先帶紬緞二千斤之處爲數無多臣等仰體皇上優恤遠夷至意業准其帶往奏入報聞其國王姓名世系遠者無考近而可知者曰士的亞多傳子非里地力非力地力傳子亞敦非里地力是爲瑞國王云

噠國

噠國地居西北方凡歷海洋六萬餘里始達廣東界一名但國卽黃祁地與荷蘭相對隔一小海國中土地平衍山澤少著名者有一山土名士噠國人皆從此出入前臨大海左右設礮臺距王城五十里王所居土名顛地墨王名非厘德歷王父爲奚成王祖爲奚厘成其遠者無考其國人風俗則信奉天主多同暎咭喇土產黑鉛琥珀白金及大青葡萄乾之屬自

雍正間有夷商來廣通市後歲以爲常每夏秋之交由虎門入口至廣東易買茶葉瓷器絲斤至冬初風信到時駕船而歸本港商人無至其國者乾隆元年進口貿易

謹按瑞噠二國皆與俄羅斯接壤海國聞見錄有黃祁普魯社吝因細密里也四國皆在北海以地圖潑之卽瑞噠二國也

咪喇啞國

咪喇啞俗稱花旗與加那大啖咭喇接壤啖咭喇言是其屬國也啖咭喇之南爲咪喇啞咪喇啞之西亦爲蠻人所居其地產皮其東海中有島名西氤地亞乾隆五十二年進口貿易其後來舶甚多幾與啖咭喇相埒其舶較他國差小隨時可至非如他國必八九月始能抵口也今各國通行

字相傳爲馬邏可國所遺用二十六字母諧聲比附以成字各國大略相同謂之拉丁字亦謂拉體納字嘉慶二十二年匪犯詐搶咪喇嚙夷船經督臣蔣攸銛拏獲奏辦○奉聖諭此案咪喇嚙國喚哂夷船在香山外洋停泊蠻民李奉廣等詐搶拒捕殺傷夷人五命該督將李奉廣等拏獲恭請王命分別斬梟並傳齊該國在粵夷商環視行刑俾知天朝法度森嚴咸知畏服所辦甚是至將喚哂夷人量加賞恤一節則辦理錯誤喚哂夷船如係裝載該國貨物運赴粵省銷售被內地奸民搶劫殺傷除將匪犯正法外自應優加賞恤以示懷柔茲該夷人所帶鴉片煙泥是例禁之物如該夷人私運入口卽應按律治罪今因其橫被劫奪戕害數命不行究治已屬恩施何得再加賞恤蔣攸銛卽通行曉示各夷商以鴉片煙泥產

自外夷不准私入內地天朝例禁綦嚴此次曠毗夷船私販煙泥因其未經進口又遭劫掠是以祇將煙泥燒燬免其治罪嗣後各夷船儻再有私帶鴉片煙泥者進口之日兵役等照例嚴搜一經搜出除將煙泥焚燬沈溺外必將私販之人從重治罪決不寬貸如此嚴切曉諭先令各夷商一體周知其知儆懼將來有犯必懲更不能託詞未悉例禁也

唵喇國

唵喇前未通中國亦佛郎機屬也乾隆七年進口貿易地近噶喇巴其進口也由噶喇巴所屬之曼打拉撒陸路三二日可至若舟行遇東北風一日卽至云

馬塔喇國

馬塔喇前世未通中國其地與小西洋望娑羅麻倫徐二國皆沿海長數千里回回種也土產絲花花椒魚翅乾隆七年進口貿易

嚙喟國

嚙喟國紅毛所屬也自小西洋北爲望娑羅國又北爲麻倫徐國又北少西爲啖咭喇國又北少西爲嚙喟國有城郭物貨殷阜風俗淳厚土產瑪瑙絲花乳香沒藥阿魏魚膏魚翅馬塔喇啖咭喇曉包補卽肚諸國在此貿易紅毛居其國者常數千人其後爲曉包補地乾隆四年進口貿易

蘇喇國

蘇喇國回回種也或曰日本明之蘇門答刺國鄭和下西洋凡三至其國封其酋宰奴里阿必丁爲蘇門答刺國王迨萬曆閒國兩易姓更國名曰亞

齊土產西洋布丁香肉果水安息蘇合油其貢物有寶石瑪瑙水晶石青
回回青善馬犀牛龍涎香沈香速香木香丁香降真香刀弓錫瑣服胡椒
蘇木硫黃之屬地本瘠無麥有禾一歲二稔市道稱平內地商船常往買
易自湄曄國北舟行三日陸路四五日可至其國風俗同湄曄物產惟血
蝎爲湄曄所無乾隆九年進口

雙鷹國

雙鷹又名打嚏奉天主教風俗與西洋同與單鷹國爲兄弟患難相恤海
舶來粵者用白旗上畫一鷹二頭乾隆四十五年進口

單鷹國

單鷹在雙鷹西北風俗與雙鷹同市舶用白旗畫一鷹乾隆五十二年進

口

鷹國

鷹國紅毛種也乾隆五十一年進口

謹按雙鷹單鷹與鷹國皆不知其名但據旗幟爲稱

噠國

噠國紅毛種也乾隆三年進口

畔啫哩國

畔啫哩紅毛種乾隆五年進口

毗喇峙國

毗喇峙紅毛種乾隆十七年進口

數閒盧國

數閒盧紅毛種乾隆五十二年進口

甚波立國

甚波立亦紅毛種也嘉慶七年進口

咕味啞國

乾隆五十一年總督孫士毅咨准監督咨開粵東近省州縣春夏以來雨水愆期以致近山田畝收成歉薄米價昂貴據洋商與各國夷人詢悉附近呂宋國地方米穀平賤等語當經面諭洋商僱船赴買運回接濟隨據萬和行洋商蔡世民稟稱覓有咕味啞夷船前往外洋呂宋國採買一萬餘千石回粵糶賣所有該船載米進出鈔規懇恩寬免查夷船進出稅鈔

一年一次征收今去而復回其求免似屬情理等因准此查乾隆八年十月二十七日准戶部咨欽奉諭旨外洋來粵米石在萬石以上例止免船貨稅銀十分之五今咕味啞前往外洋呂宋國買米請免稅鈔夷船進出稅鈔一年一次征收今去而復回求免似屬情理雖與定例稍有未符但該船貨來粵應征鈔稅業已報納茲該船出洋採買事屬因公自可免其征鈔相應咨覆查照

啞啞國

啞啞卽俄羅斯也俄羅斯例在恰克圖通市嘉慶十年十二月有該國夷商嚕啞啞噸吟噴哂二船載皮張銀兩至廣東貿易經總督那彥成奏○奉諭旨那彥成奏先准延豐咨商有啞啞國卽俄羅斯商船二隻載有皮張

銀兩來廣貿易應准開艙輸稅咨商會銜具奏那彥成正在議駁聞又接延豐來字以新任阿克當阿抵粵延豐卽日交卸起程將此案事宜會銜具奏那彥成阻止不及因飛札與新任監督暫止開艙卸貨以免日後滋弊各等語此事前據延豐奏到朕卽以伊等所辦蠱率傳旨申飭並將延豐議處那彥成孫玉庭均交部察議諭令吳熊光卽查明該商船如尙未卸貨卽令停止納稅奏聞候旨遵行茲那彥成奏俄羅斯僻在極北向止許在恰克圖一帶通市今請來廣貿易恐奸商貪利私售且來往熟悉海道及內地情形亦多未便等語那彥成辦理此事與朕意相符所見甚是那彥成有此一節可嘉其在粵東總督任內所獲各罪衍將來議上時朕尙可加恩末減現在那彥成業已飛札阿克當阿止其開艙卸貨吳熊光

應卽會同阿克當阿曉諭該商以爾等船向止在恰克圖通商貿易本有一定界限不可輕易舊章著卽將船隻貨物駛回本國不許在廣逗遛並著吳熊光迅飭海船各口岸或該商駛往別處海口懇求通市均一體駁回並著嗣後嚴密稽查如各海口有似此越界欲求通市者俱實力禁止免滋事端○又奉諭旨昨因延豐於啞啞國商船至粵擅令交易一事辦理蠱率已降旨申飭並因延豐摺內有札商那彥成及會商孫玉庭之語是以將延豐交部議處那彥成孫玉庭交部察議本日據那彥成奏稱於陸豐途次接准延豐咨商啞啞國卽俄羅斯商船二隻來廣懇請貿易咨商會銜具奏那彥成正在議駁間適接延豐來字以新任監督阿克當阿抵粵延豐卽日交卸已將此案事宜會銜具奏那彥成接信後已阻止不

及因飛札新任監督暫止開艙卸貨以免日後滋弊各等語那彥成所見甚是與朕意適相符合而前此延豐具奏摺尾後聲敘督臣那彥成現在出省巡閱與之札商並與撫臣孫玉庭面商意見相同合同詞具奏是延豐於辦理此事既經札商督臣並不候那彥成札覆是否准貿易之處熟商妥辦輒敢擅將意見相同之語誑詞入奏實屬專擅乖謬前經交部議處尙覺稍輕延豐著交部嚴加議處那彥成於俄羅斯商船來粵通市接延豐札商時卽欲議駁原無不合所有前次交部察議之處著卽行撤回至孫玉庭現駐在省城於延豐會商時未經阻止亦隨同准令卸貨輸稅實屬錯誤孫玉庭仍著交部察議

嘉慶十一年正月奉諭旨據吳熊光等奏查明啞啞國來廣貿易情形一

摺略啞國卽俄羅斯國向例止准在恰克圖地方通市貿易本有一定界限今該國商船駛至粵東懇請赴關卸貨自應照例駁回乃延豐擅准進埔卸貨實屬冒昧且該國商船於十月初八十七等日先後進口延豐於二十九日始行具奏又於咨商總督後並不候那彥成回咨輒以意見相同之語捏詞入告其咎甚重前經降旨將延豐降爲七品筆帖式尙不足以示懲延豐著卽革職仍令在萬年吉地工程處效力行走接任監督阿克當阿因延豐已准該夷商起卸一船貨物亦卽不候那彥成移知率准後船進埔卸載吳熊光孫玉庭未經詳查明確遽准開船回國均屬辦理未協不能無咎吳熊光孫玉庭阿克當阿均著交部議處嗣後遇有該國商船來廣貿易者惟當嚴行駁回毋得擅准起卸貨物以昭定制○又奉

諭旨略啞國貿易船隻業據行商承保起卸貨物自未便復行稽阻此次姑著准其貿易嗣後再有該國船隻來至澳門卽應嚴行斥駁不得擅與通市此一節並諭阿克當阿知之

啞唛國

道光四年奉上諭據阮元等奏小西洋啞唛國啞唛噠夷船一隻載有胡椒檳榔等貨來至零丁洋面寄碇該國從前並未來過詢係夷商各自各夥並非該國王遣令貿易暫令停泊候旨等語該夷遠涉重洋此次姑照嘉慶年間成案暫准貿易以示體恤該督等卽飭令洋商傳諭該夷等此處暫准易貨回國係天朝特恩不得援以爲例嗣後斷不准再來通市將此諭知阮元等並傳諭七十四知之

越南國

越南舊安南國地嘉慶七年安南國王阮光纘負恩納叛自取滅亡農耐國長阮福映遣使恭進表貢縛送洋盜莫觀扶等三犯是年十二月奉諭旨安南國爲南徼藩服前此黎維祁與阮光平構兵先經率屬內投繼復棄國潛遁皇考高宗純皇帝以黎維祁異懦無能不能自振天厭黎民不宜復加扶植惟念其流離失所將黎維祁送京入旗授職養贍其時阮光平修表敏關籲求內附並請親詣闕廷祝釐瞻覲皇考高宗純皇帝鑒其誠悃錫之勅印封阮光平爲安南國王阮光平受封之後時修職貢終其身祇承恩眷及伊子阮光纘嗣封比年來閩粵洋面屢有劫盜經疆吏訪聞入告該國竟有潛通窩納之事朕以誠信懷遠人尙謂事涉疑似祇令

飭知該國一體查緝旋據阮光纘自陳惶悚堅稱實不知情本年八月吉慶奏到農耐國長阮福映遣使齎進表貢縛送盜犯莫觀扶等三名係內地奸民經安南招往授以僞職並給與印劄行劫內洋審訊明確已伏厥辜是阮光纘參養盜賊通同劫掠負恩背叛情跡顯然實爲王章所不宥設阮光纘此時尙膺封土必應聲罪致討以懲兇詐乃伊國連年與農耐戰攻上年阮福映拔取富春時阮光纘輒將天朝所頒勅印遺棄潛逃其罪更無可逭阮光纘不念皇考高宗純皇帝覆幬深恩又不能繼伊父之志於臣爲不忠於子爲不孝今已自取滅亡益見傾覆之理昭然不爽阮福映能爲天朝緝捕逋逃縛獻請旨定奪並將安南舊領勅印遣使呈繳深爲恭順茲表陳構兵顛末本係爲伊先世復讐雖得其國土不敢擅專

虔遣陪价納貢請封除將表文請賜建國名號之處交大學士會同六部
尙書議奏外所有安南阮光纘獲罪覆滅及阮福映恭順出力緣由先行
通諭中外知之○尋經大學士六部尙書議曰考安南古曰南交周曰交
趾至趙佗竊據始自稱爲南越王旋爲漢滅郡縣其地今南海蒼梧鬱林
合浦皆爲廣東西兩省州縣至五代時土人曲承美據交州僅授爲靜海
軍節度使宋太祖開寶三年封丁部領爲安南郡王眞宗天禧元年封李
公蘊爲安平王至孝宗淳熙元年封李天祚爲安南國王安南立國自此
始元明至本朝封號皆因之覈其疆域實止南越之一隅未便以一隅之
地遽以南越自稱且廣東廣西皆南越之舊地自漢以來久爲中國若該
國復南越之古名實既不相符體制尤爲未協所有該國長請賜名南

越之處應毋庸議

嘉慶八年六月奉聖諭前此農耐國長阮福映表陳與安南構兵顛末爲先世復讐恭遣陪价齎繳阮光纘遺棄舊頒勅印並縛獻海洋逋盜恪恭請命朕鑒其航海輸誠特予嘉納曾經明降諭旨將安南阮光纘獲罪覆滅及阮福映恭順出力緣由先行宣示中外嗣節據該國長請錫新封陳明該國係先有越裳之地今併有安南不願忘其世守籲懇仍以南越名國經疆更據情入告部臣議駁以南越命名與徼外封域未協特念其敝關內附敬抒惻忱命用越南二字以越字冠於上仍其先世疆域以南字到於下表其新錫藩封並令廣西撫臣孫玉庭一面檄知阮福映一面委員伴送齎進表貢使臣赴京諭其緩程行走以示天朝柔遠之意茲復據

孫玉庭奏稱阮福映接奉欽定越南恩命倍深感激情詞懼忭出於至誠該使業已起程北上計七月下旬即可到京等語應卽加之寵命封爲越南國王所有應行頒給該國王印信勅書等件著各該衙門查照定例先期預備並著欽天監衙門於頒行時憲書內將安南二字改爲越南永遵正朔至將來冊封時著派廣西臬司齊布森將新頒勅印帶同來使齎捧出關前往宣示詔旨俾該國王長承恩眷世守勿替將此通諭知之

道光九年四月上諭此次越南國王因內地生監遭風漂收到境卹給衣糧盤費護送回粵實屬恭順可嘉所有帶來各貨及將來出口貨物均著加恩免其納稅至該國王請由海道來粵通市一節自當照例駁回但須妥爲曉示著李鴻賓等傳諭該國王現據爾國王請由海道來粵通市業

經奏聞大皇帝以爾國王久列藩封素爲恭順爾國地界毗連兩廣向與內地商民有陸路交易處所貨物流通足資利用非他國遠隔重洋必須航海載運者可比外夷諸國如有於各海口越界求通貿易例禁綦嚴今若允爾國王所請誠恐各外夷船隻偶有撓越混入以致滋生事端於爾國王諸多不便轉非所以體恤是以仍令爾國王恪守舊章於廣東欽州及廣西水口等關各陸路往來貿易毋庸由海道前來此係大皇帝格外施恩曲加優眷爾國王其善體此意敬謹遵循爲要該督等接奉此旨卽行遵照妥爲辦理

道光十三年六月上諭本日據盧坤等由驛馳奏越南國呈覆照會捕盜咨文並報到漂失師船已在該國收泊款給修整送回一摺上年十二月

二十五日廣東提標中營二號米艇配帶官兵七十員名因遭風漂流越南茶山洋面收泊經該國王迎救抵次優給供頓費用代修船隻在彼閱四月之久外委梁國棟因遭風受瘴身故復爲遣官料理祭贈有加及師船起程各兵又有賞賚並撥醫隨行派兵幫駕添械防禦已於本年五月初四日駛進虎門越南國遠隔重洋素稱恭順今該國王於內地兵船遭風漂收到境優待款給種種周詳曲到虔恪盡禮可嘉之至著降勅褒獎並賞賜該國王蟒緞四疋內緞四疋素緞四疋以示寵嘉此次該國王帶有押艙貨物及將來出口貨物俱著加恩免其納稅仍循照舊章先行開艙起貨銷售俾免稽遲所有該國差官黎之謙等著該督撫優加賞賚交該國頒賞該督先行文該國王知之

歷年夷船來數附

乾隆十四年己巳十二月二十六日起至十五年十二月二十五日止一

年期內來庚午年分船十有八

謹案乾隆十三年以前案牘無存可考者自十四年始每年連閏月統算以足十二月爲一年有餘月卽歸下年接算閏月遞積遞多以干支年份按之益溢本年之外關例如此今仍之

十六年十一月二十五日止來辛未年分船十有九

十七年來壬申年分船二十有五

十八年癸酉年分同上俱來船二十有六

十九年十月二十五日止來甲戌年分船二十有七

二十年上期同來年乙亥船二十有二

二十一年閏九月二十五日止來年丙子船十有五

二十二年九月二十五日止來年丁丑船七

二十三年上期同來年戊寅船十有二

二十四年八月二十五日止來年己卯船二十有三

二十五年來年庚辰船十有三

二十六年上期同來年辛巳船十有三

二十七年七月二十五日止來年壬午船十

二十八年來年癸未船十有七

二十九年上期同來年甲申船二十有四

三十年六月二十五日止來年乙酉船三十有一

三十一年來年丙戌船三十

三十二年期俱上來年丁亥船二十

三十三年五月二十五日止來年戊子船二十有三

三十四年來年己丑船二十有三

三十五年期俱上來年庚寅船二十有九

三十六年四月二十五日止來年辛卯船二十有六

三十七年期同上來年壬辰船三十

三十八年閏三月二十五日止來年癸巳船二十有八

三十九年三月二十五日止來年甲午船三十有一

四十年上期同來年乙未船三十有四

四十一年二月二十五日止來年丙申船二十有六

四十二年來年丁酉船三十有九

四十三年同期俱上來年戊戌船三十有三

四十四年正月二十五日止來年己亥船二十有八

四十五年來年庚子船二十有五

四十六年同期俱上來年辛丑船三十有五

又四十六年十二月二十五日止來年壬寅船二十有四

四十七年來年癸卯船十有四

四十八年同期俱上來年甲辰船三十有六

四十九年十一月二十五日止來年乙巳船三十有五

五十年來年丙午船四十有六

五十一年期俱來年丁未船六十有八

五十二年十月二十五日止來年戊申船七十有三

五十三年期同來年己酉船六十有五

五十四年九月二十五日止來年庚戌船八十有三

五十五年來年辛亥船五十有九

五十六年期俱來年壬子船三十有八

五十七年八月二十五日止來年癸丑船五十有五

五十八年來年甲寅船四十有四

五十九年期俱來乙卯船四十有三

六十年七月二十五日止來丙辰船五十有九

嘉慶元年期同來丁巳船五十有三

二年閏六月二十五日止來戊午船五十有一

三年六月二十五日止來己未船六十有三

四年期同來庚申船五十

五年五月二十五日止來辛酉船五十有九

六年來壬戌船六十有四

七年期俱來癸亥船七十

八年四月二十五日止來甲子船八十有四

九年來乙丑年分船七十有七

十年期俱同上來丙寅年分船八十有五

十一年三月二十五日止來丁卯年分船九十有七

十二年來戊辰年分船九十有六

十三年期俱同上來己巳年分船八十有七

十四年二月二十五日止來庚午年分船六十有六

十五年來辛未年分船七十有七

十六年期俱同上來壬申年分船五十有一

十七年正月二十五日止來癸酉年分船七十有三

十八年來甲戌年分船五十有一

十九年期俱上來年乙亥船四十有七

又十九年十二月二十五日止來年丙子船五十有二

二十年期同上來年丁丑船七十有三

二十一年十一月二十五日止來年戊寅船一百四

二十二年來年己卯船一百一

二十三年期同上來年庚辰船八十有八

二十四年十月二十五日止來年辛巳船九十

二十五年來年壬午船九十有六

道光元年期同上來年癸未船九十有四

二年九月二十五日止來年甲申船八十有四

三年期同上來年乙酉船六十有五

四年八月二十五日止來年丙戌船七十有一

五年來年丁亥船一百一十有二

六年期同上來年戊子船八十有九

七年七月二十五日止來年己丑船一百三

八年來年庚寅船八十有六

九年期同上來年辛卯船七十有六

十年六月二十五日止來年壬辰船九十有九

十一年來年癸巳船七十有七

十二年期同上來年甲午船八十有七

十三年五月二十五日止來乙未年分船一百五

十四年來丙申年分船一百四十有三

十五年來丁酉年分船一百四十有九

十六年四月二十五日止來戊戌年分船一百九十有九

十七年來己亥年分船二百十有三

十八年庚子年分來船一百二十有九

粵海關志卷二十五

行商

臣謹按國朝設關之初番舶入市者僅二十餘桅至則勞以牛酒令牙
行主之沿明之習命曰十三行舶長曰大班次曰二班得居停十三行
餘悉守舶仍明代懷遠驛旁建屋居番人制也乾隆初年洋行有二十
家而會城有海南行至二十五年洋商立公行專辦夷船貨稅謂之外
洋行別設本港行專管暹羅貢使及貿易納餉之事又改海南行爲福
潮行輸報本省潮州及福建民人諸貨稅是爲外洋行與本港福潮分
辦之始其後本港既分隸無常總商章程亦屬易蓋商得其人則市易
平而夷情洽商不得人則逋負積而餉課虧聖訓昭垂諄諄於停貢獻

禁採辦凡以爲郵商也而拖欠夷債者必寘之重法所以示調劑之平而專責成之效成規具在董其事者曷可不加之至意哉

凡粵東洋商承保稅餉責成管關監督於各行商中擇其身家殷實居心誠篤者選派一二人令其總辦洋行事務並將所選總商名姓報部備查凡外洋夷船到粵海關進口貨物應納稅銀督令受貨洋行商人於夷船回帆時輸納至外洋夷船出口貨物應納稅銀洋行保商爲夷商代置貨物時隨貨扣清先行完納

乾隆四十二年三月奉聖諭據李質穎奏革監倪宏文賒欠暎咭喇國夷商貨銀一萬一千餘兩監追無著經伊胞兄倪宏業外甥蔡文觀代還銀六千兩餘銀五千餘兩遵旨於該管督撫司道及承審之府州縣照數賠

完貯庫俟夷商等到粵給還並請將倪宏文卽照部議酌發等語倪宏文赤手無賴肆行欺詐賒欠夷商貨銀多至纍萬情殊可惡而其應追銀兩半係伊兄伊甥措繳半係地方官代賠伊轉得脫然無累僅予發遣實不足以蔽辜倪宏文著發往伊犁永遠安插以示儆懲

乾隆四十五年七月刑部會奏言廣東巡撫李湖等奏稱廣東行商顏時瑛等借欠夷商銀兩分別扣繳給還一摺奉硃批該部議奏欽此欽遵鈔出到部查例載交結外國誑騙財物發遠邊充軍等語今行商顏時瑛張天球明知借欠奉有例禁乃不將每年所得行用餘利撙節歸還任聽夷人加利滾算顯存誑騙之心應如該撫等所奏顏時瑛張天球應均照交結外國誑騙財物例擬軍從重革去職銜發往伊犁當差以示懲儆再該

撫等奏稱所有泰和裕源行兩商資財房屋交地方官悉行查明估變除扣繳應完餉鈔外俱付夷人收領其餘銀兩著落聯名具保商人潘文巖等分作十年清還庶各行商人不能私借夷債並不敢混保匪人而放債之夷人既免追銀入官且原本之外多得一倍益感天朝寬大之仁併將辦理緣由剴切曉諭該大班令其於各該國夷船回航時稟請該國王嚴飭港腳鬼子嗣後不許違禁放債如有犯者卽追銀入官驅逐回國臣等更有請者向來外番各國夷人載貨來廣各投各商交易行商惟與來投本行之夷人親密每有心存詭譎爲夷人賣貨則較別行之價加增爲夷人買貨則較別行之價從減祇圖夷人多交貨物以致虧本遂生借銀換票之弊臣等雖嚴行示禁該行商等因無定例亦視爲故套非奉明立科

條終難禁遏臣等悉心籌酌請自本年爲始洋船開載來時仍聽夷人各投熟悉之行居住惟帶來貨物令各行商公同照時定價銷售所置回國貨物亦令各行商公同照時定價代買選派廉幹之員監看稽查臣圖明阿隨時畱心察訪務使交易公平盡除弊竇所有行用餘利存貯公所先完餉鈔再照分年之數提還夷人等語查乾隆二十四年十二月軍機大臣議准原任兩廣總督李侍堯條奏內地行商人等有向外夷違禁借貸者照例問擬所借之銀查追入官等因在案今據該撫等奏稱夷人違禁放債又復重利滾息自應照例追銀入官惟念該夷人於二十三年放債尙在例禁以前仰體皇上綏柔遠人至意按其原本照例加一倍追還等語查顏時瑛等所供原欠夷人銀兩旣係自二十三年起陸續所借而該

夷商等於未禁之時並未截清欠數呈請追還是否在例禁以後有無續行借過之處自應查明分別酌辦但聯名具保之潘文巖等共有幾人顏時瑛等家產現在估變若干除提餉鈔外餘剩銀兩給付夷人其不敷若干如何攤派分扣之處該撫摺內均未分晰聲明戶部礙難覈議應令另行查明奏到日再議至請自本年爲始洋船載來貨物及回國所置貨物俱令各行商公同照時定價銷售再行選派廉幹之員監看稽查行用餘利存貯公所先完餉鈔等語查行商交易自應聽從其便今因商人每多心存詭譎祇圖夷人多交貨物於臨時定價任意高下致有虧本借貸諸弊應行設法示禁清理但如該撫等所請派員監看稽查立法之初或無他故久或官員索規吏胥取費難保其無需索擾累漸且串通作弊更難

究詰是立一法而欲得其益轉致由此而滋其弊亦正不可不防其如何
整飭行規應令該督巴延三監督圖明阿一併查明妥議具奏到日再議
再此案係刑部主稿合併聲明臣等謹會同戶部具奏○奉旨依議

乾隆四十九年九月軍機大臣會同總督奏言查粵海關監督穆騰額奏
洋商蔡昭復拖欠夷人番銀一十六萬六千餘兩卽飭令出結之保商等
按年照數分還以清夷欠一摺奉硃批知道了欽此昨又據舒璽告知
面奉聖諭令臣等會同該督議奏欽此臣等當卽詢之舒璽據稱洋商拖
欠夷人銀兩總由夷人於回國時將售賣未盡物件作價畱與洋商代售
售出銀兩言明年月幾分起息洋商貪圖貨物不用現銀輒爲應允而夷
人回國時往往有言定一年託故不來遲至二三年後始來者其本銀旣

按年起利利銀又復作本起利以致本利輾轉積算愈積愈多商人因循負累久而無償等語臣等公同酌議嗣後洋商接受夷人貨物必須公平定價並令眾商立保將來可以清償始准存留仍立定限務將本利按年全還不得以於限外稍有拖欠如逾限不清卽照此次蔡昭復之例令出保各商先爲填還其夷人回國時亦止准於立定年限內按本起利如逾限託故不來卽停止利銀尤不得以利作本違例滾剝如此立定章程則夷人回國時旣得銷售貨物而行商起息銀兩各有限期自易清還亦可不致拖延積重於柔遠恤商之道彼此均有裨益俟命下臣舒璽回粵後卽會同粵海關監督穆騰額遵照妥辦○奉旨依議

乾隆五十五年十二月奉聖諭從前廣東巡撫及粵海關監督每年呈進

貢品俱令洋商採辦物件賠墊價值積習相沿商人遂形苦累上年欽派
尙書福康安前往查辦將巴延三等分別治罪明降諭旨嚴飭該督撫等
嗣後不准呈進鐘表洋貨等物並嚴禁地方官向商人墊買物件以杜弊
端今粵海關監督穆騰額奏稱該商等感戴恩施代爲呈貢物件但粵省
洋商究非兩淮可比此次例進物件業已到京姑准畱用外嗣後不准該
商等再行呈進貢物俾商力益得寬裕至粵海關監督向不進呈貢物自
德魁由如意館出任監督備物進呈李質穎等遂相沿辦理但念該監督
每年養廉不過二千五百兩辦公及家用外未必能多有餘貲不可與三
處織造及鹽政養廉豐厚者比嗣後該監督亦不準備物呈進至該督撫
及監督等不得因洋商現已停止進貢復藉端令墊買物件致滋擾累以

示朕體恤遠商之至意若日久廢弛故智復萌必重治其罪

謹按嘉慶二十五年十月總管內務府奏准各省將軍督撫織造鹽政

關差畢獻方物若一概停止究於體制未協且無以申芹獻之忱所有

方物仍照舊例呈進粵海關監督遵奉行知准進朝珠鐘表鑲嵌掛屏

盆景花瓶琺瑯器皿雕牙器皿伽備香手串玻璃鏡日規千里鏡洋鏡

乾隆五十六年奉聖諭行商吳昭平揭買夷商貨價久未清還情殊可惡

應照擬發遣所欠銀兩估變家產餘銀先給夷商收領不敷之數各商分

限代還但內地商人拖欠夷商銀兩若不卽爲清欠轉致貽笑外夷著福

康安等卽將關稅盈餘銀兩照所欠先給夷商收領再令各商分限繳還

歸款

乾隆六十年七月奉聖諭朱珪等奏洋商石中和拖欠夷貨價銀審擬具奏一摺已批該部議奏矣粵省洋商承售夷貨先將價值議定俟轉售後陸續給價其未售之貨俟下次洋船到時一面歸清舊欠一面又交新貨不能年清年款固屬實在情形但洋商等承售洋貨卽新舊牽算每有拖欠亦應予以限制此案石中和積欠夷商貨銀除變產抵還外尙欠五十九萬八千餘兩爲數實屬過多現據該夷商呈控業經照例懲辦將無著銀兩著令通行分限代還自可依限清理但此後各行商等似此拖欠過多或該國王聞知以內地行商拖欠夷人帳目多至數十萬兩或竟具表上聞實屬不成事體著傳諭廣東督撫及粵海關監督嗣後洋商拖欠夷人貨價每年結算不得過十餘萬兩如有拖欠過多隨時勒令清還卽自

今歲爲始通飭各洋商一體遵照辦理將此諭令知之
嘉慶五年監督佶山奏言竊臣欽承恩命監督粵海關稅務於嘉慶四年
八月十二日抵任所有一切權務悉照舊章辦理勿事更張惟查粵海關
征輸餉課招接民夷商貨現有外洋行本港行福潮行三項名目外洋行
專辦外洋各國夷人載貨來粵發賣輸課諸務本港行專管暹羅貢使及
夷客貿易納餉之事福潮行係報輸本省潮州及福建民人往來買賣諸
稅其外洋本港一切納餉諸務乾隆十六年間俱係外洋行辦理共有洋
行二十家並無本港名目亦無福潮行名止有省城海南行八家迨乾隆
二十五年洋商潘振成等九家呈請設立公行專辦夷船批司議准嗣後
外洋行商始不兼辦本港之事其時查有集義豐晉達豐文德等行專辦

本港事務並無稟定設立案據其海南行八家改爲福潮行七家亦無案可稽迨乾隆三十五年因各洋商潘振承等復行具稟公辦夷船眾志紛歧漸至推諉於公無補經前督臣李侍堯會同前監督臣德魁示禁裁撤公行名目眾商皆分行各辦而本港行亦屢有開閉嗣後有如順行劉如新怡順行辛時瑞萬聚行鄧彰傑於乾隆六十年因拖欠夷帳被控押追由南海縣詳議將本港行三家概行革除該商所欠暹羅夷帳著外洋行眾商先行墊還即將本港之行用分年扣還商欠其本港事務仍著外洋行兼辦以昭慎重業據稟准行旋於嘉慶元年五月據外洋行商以不能兼顧爲辭呈請將本港行事務改歸福潮行商人經理議定章程仍由外洋行統轄復於是年十二月據福潮眾商公舉福潮昌隆行陳緒衍之弟

陳長緒承開本港行一家詎陳長緒恃其獨行大肆壟斷侵吞客商於臣到任後疊被客人張啓拔王名利等告發卽於嘉慶四年九月間委粵盈庫大使詢明追還商欠咨明督臣將該商陳長緒立行斥革臣因與督臣再三籌議本港之生意雖非若外洋行之必須大本行商方可承充而招接暹羅貢使貿易稅餉諸務事頗非細如外洋行有身家之人又不欲充當若仍以不甚殷實本分之人董司其事則將來弊竇正難預計至外洋行之不願兼辦本港者非力不能兩顧不過以外洋之生計利厚自居大商視本港之行利微細若輕取行用則徒費經營如重取行用又恐致訐控是以屢爲規避而本港行多設行口旣非經久之道止開一家又起壟斷之階莫若仍著外洋行永遠兼理或公同照料或公委二家承當凡有

侵吞把持客商諸弊一經告發惟諸洋商是問在諸洋商自顧身家必謹
慎自持諒不敢復蹈前轍也此事臣酌定章程不難卽飭洋商遵諭辦理
第恐日久弊生若不奏明則將來該商等窺便推諉本港行一開又必致
有劉如新陳長緒等案相應仰懇聖恩俯准將本港一行裁革仍歸外洋
行兼理永著爲例庶可不悞餉務取信民夷歷久無弊矣臣與督臣往來
計議意見相同爲此具奏奉硃批洋行之本總須正己督率切勿剝削汝
斟酌旣妥卽照汝所辦可也旋經監督咨稱案照本港行事務前經奏准
歸併外洋行辦理當經諭飭該商等遵照去後隨據該商潘致祥盧觀恆
等稟稱當卽悉心細籌公同酌議所有本港行事務議舉二行值年辦理
自嘉慶五年爲始本年舉議同文廣利二行值年六年分係怡和義成二

行值年七年分係東生達成二行值年八年分係會隆麗泉二行值年週而復始輪流值辦如有新充之商卽令挨次輪值歇業之商應請除名不准辦理庶洋行現商無分新舊按年挨次輪值無可推諉實爲公當至洋行兼辦本港船事務必須設立章程俾眾知所遵守畫一辦理不致日久廢弛滋生事端始可垂諸永久容商等另行悉心妥議章程稟請憲示飭遵商等理合先將遵辦緣由稟覆察奪等情據此查本港行事務各商等輪年值辦最爲公當除批示出具認狀照依本港行向辦事宜自行議明輪年承辦務使商賈流通無欺無詐於國課商夷兩有裨益

嘉慶十八年監督德慶奏言竊照外洋夷商重譯梯航來廣貿易全賴洋行商人妥爲經理俾知樂利向風以昭天朝綏懷遠夷至意臣蒙恩簡任

以來一切俱有舊章可循尙無應須查辦之事惟查舊卷見從前辦理洋商欠餉之案俱移會督撫將乏商家產查封變抵其不敷銀兩著落接辦行業之新商代爲補足如行閉無人接開眾商攤賠完結倘再有虧欠夷人銀兩卽會同督撫專摺奏明從重治罪歷來辦理無異卽如嘉慶十五年間有福隆行洋商鄧兆祥虧餉潛逃經前監督常福移會前督臣百齡檄飭地方官一面嚴緝一面將該逃商家產查封備抵稅餉其行業查有職員關祥向在該行司事其子關成發亦隨父幫辦有年經洋商黎顏裕結保關成發接辦福隆行務卽責令先行墊完鄧兆祥所欠稅餉俟查明鄧兆祥遺產給領變抵雖經辦結在案而鄧兆祥尙未弋獲未得卽加懲創現在飭行地方官上緊嚴緝務獲究辦臣伏思洋商承攬夷貨動輒數

十萬兩承保稅餉自數萬兩至十餘萬兩不等責成綦重非實在殷實誠信之人不克勝任向來開設洋行僅憑一二商保卽准充商並不專案報部本非慎重之道遇有一商虧餉每致貽累通行而不肖疲商於夷船進口時每有自向夷人私議貨物情願貴買賤賣只圖目前多攬不顧日後虧折迨至開征卽形支絀揆厥所由祇因向無總商辦理未能畫一眾商爭先私攬相率效尤遂成積習臣到任後訪悉前情卽嚴行飭禁並督同一二誠實商人隨時稽查極力整頓兩年以來各商辦理尙無貽悞惟商力急切未能全臻充裕催征稅課仍有竭蹶情形如將稍乏之商概行革退另招新商則一時難得其人且生手不諳夷情更恐辦理不善臣與督臣蔣攸銛再四講求與其紛更而無當不若因時以制宜商人之弊巧雖

多同行之耳目難掩祇以向無督率之責殷商避罪而容隱乏商效尤而競利遂致積習難返關務日疲今欲整關務須察商情欲除弊竇須專責任惟有於各洋商中擇其身家殷實居心公正者一二人飭令總理洋行事務率領各商與夷人交易貨物務照時價一律公平辦理不得任意高下私向爭攬倘有陽奉陰違總商據實稟究臣仍不時面諭各商崇儉黜華各顧大體以期積弊盡除商力漸裕並嗣後如遇選新商責令通關總散各商公同慎選殷實公正之人聯名保結專案咨部備查倘所舉不實或有虧欠餉項情事著落原保商賠繳其因事革退者亦隨咨部註銷令每年滿關後仍將商名造冊隨同各冊檔送部查考以昭慎重如此立定章程庶現在各商可望日有起色將來亦不濫用非人貽累關務○奉聖

諭粵東洋商承保稅餉向來僅憑一二商人保舉准充旋因虧折疲乏拖欠逋逃弊竇叢滋著照該監督所請准於各洋商中身家殷實居心誠篤者選派一二人令其總辦洋行事務率領眾商公平整頓其所選總商先行報部存案遇有選充新商時卽責令通關散總各商公同聯名保結專案咨部如有黜退報明註銷并於每年滿關日將商名通行造冊送部以備稽考該部知道

嘉慶二十年十一月奉聖諭蔣攸銛等奏查明洋商拖欠夷人貨帳銀兩業經停利歸本請勒限分年清還一摺該商等經此次清釐之後自遵照定限一律清還毋令再有拖欠惟是該夷人以貨易貨乃壟斷盤剝任令疲商賒欠卽明知亦有不得過十萬之舊章朦朧匿報亦應嚴行飭禁近

年內地銀兩爲外夷貿易攜去者動逾百萬日久幾同漏卮著該督撫及該監督畱心稽察如外夷有以奇巧貨物攜至洋行重價求售者該監督斷不准用重價購買呈貢亦不許私行畱用此等物件飢不可食寒不可衣令其將中土財貝潛就消耗太覺不值殊爲可惜果能實力禁絕該夷人等知內地不寶異物不能行商則來者漸少易去銀兩亦必日減亦節財流之一道也

道光九年監督延隆奏言竊照粵省外洋行從前共有十三家在西關外開張料理各國夷商貿易向稱十三行街至今猶存其名惟近年止存怡和等七行其餘六家或因不善經營或因資本消乏陸續閉歇自應另招新商隨歇隨補方可以復舊觀自嘉慶十八年前監督德慶奏請設立總

商經理行務并嗣後選充新商責令總散各商聯名保結欽奉俞允准行在案是以十餘年來止有閉歇之行並無一行添設推原其故皆因從前開行止憑一二商保結卽准承充今則必需總散各商出具聯名保結方准承充在總商等以新招之商身家殷實與否不能洞悉底裏未免意存推諉倘有一行不保卽不能承充以致新商雖有急公踴躍之心而歷任監督以格於成例不便著充數年以來夷船日多稅課日旺而行戶反日少買賣事繁料理難於周到勢不能不用行夥於是走私漏稅勾串分肥其弊百出臣等愚昧之見應請嗣後如有身家殷實具呈情愿充商經臣察訪得實准其暫行試辦一二年果其貿易公平夷商信服交納稅項不致虧短卽請仍照舊例一二商取保著充其總散各商聯名保結應請停

止如此略爲變通實於國課商情均有裨益○奉上諭延隆奏請變通招募新商章程一摺粵省開設洋行止憑一二商保結卽准承充自嘉慶年間奏准設立總商經理其選充新商責令總散各商聯名保結該總商往往意存推諉以致新商格於成例不便著充數年以來洋船日多行戶日少照料難周易滋弊竇自應量爲變通著照所請嗣後如有身家殷實呈請充商者該監督察訪得實准其暫行試辦一二年果能貿易公平夷商信服交納餉項不致虧短卽照舊例一二商取保著充其總散各商聯名保結之例著卽停止

道光十七年總督鄧廷楨監督文祥會同奏言竊照粵東港口准予外夷通商全在行商經理得人方克仰副懷柔俾梯航溥沾樂利而杜私裕課

均攸賴之於權務所關非細從前洋行共有十三家因日久玩生各商內
卽有以虧餉逋債治罪者曾於嘉慶十八年經前監督德慶奏請設立總
商綜理行務并嗣後選承新商責令總散各商聯名保結等因奉旨允行
迨至道光九年各洋行陸續閉歇僅存怡和等七行不敷經理前監督延
隆以招商不前恐責令保結之總商意存推諉又經議立變通章程亦奉
旨欽遵在案自是以後缺商隨時招補至今已復十三行舊觀照料無虞
不足而新充之仁和行商潘文海試辦已歷七年屢催未據出結咨部又
孚泰行商易元昌東昌行商羅福泰暨新充尙未列冊達部之安昌行商
容有光試辦或屆二年或逾一年不等臣等現已勒限一月飭令趕緊遵
照新例出具一二商切實保結咨部以專責成如逾限無商保結卽行咨

銷其名仍查明試辦有無經手未完分別嚴追究辦惟是制事端貴因時立法尤期經久現行延隆奏准新例臣等公同悉心確覈有宜於昔不宜於今者有弊生於法終於扞格難行者蓋粵省洋行十三家由來已久每值船多稅旺從無承辦不周之虞延隆前因各行閉歇將半是以權宜變通聽殷戶自請充商察訪得實卽准其試辦其作何限制並未議及小民趨利乘便設逐漸增多伊於胡底且商眾則流品多雜稽查難周十餘年來紋銀出洋鴉片流毒以及走私漏稅諸弊叢生固由外匪因緣爲奸亦難保非蠹從內出卽如本年三月拏獲走私匪犯梁亞奇等案內起有洋商羅福泰與逸犯鄭永屏書信因牽涉肇慶水師營守備羅曉峯干預該商掛牌情事經臣鄧廷楨據實奏參奉旨革職解回提併審辦現在案雖

未定而該商資本不豐交通匪類已可概見當此查辦喫緊之時若不亟截其流誠恐弊將滋甚又試辦一層本爲擇商要術無如人心叵測安知其不於試辦一二年內巧作彌縫以求遂其承商飢法之計迨至限滿取結卮漏已形執法以從究竟何補是試辦之毫無足恃亦有斷然而無疑者至德慶奏准舊制保商必通行出結曹好曹惡一本大公何等鄭重新例則慮其或涉推諉改議一二商具保遽准承充不知推諉致有遲延其悞尙小若此一二商者使非其親昵卽事出賄通馴致覆餗債轅爲害乃大況向辦商欠之案鈔產不敷備抵統派眾商攤賠今已援爲成例無論保商與否不容稍事諉延然與其所賠非所保之人輸資類難甘服何如所賠卽所保之人濫舉各生戒心之爲愈臣等愚昧之見竊以洋商旣已

招補無缺足敷辦公卽當明立限制應請嗣後十三行洋商遇有歇業或緣事黜退者方准隨時招補此外不得無故添設一商亦不必限年試辦徒致有名無實其承商之時仍請復歸聯保舊例責令通關總散各商公同慎選殷實公正之人聯名保結專案咨部著充毋許略存推諉之私以絕其壟斷之念餘俱循照舊例一律妥爲辦理如此明立定限庶幾簡而不濫充商者必挾重貲責有攸歸保舉者務求覈實於以裕餉課而杜朋奸似亦不無小補矣○奉上諭鄧廷楨等奏請復承商舊制一摺粵東洋商自嘉慶年間設立總商經理其選充新商責令總散各商聯名保結後因夷船日多行戶日少照料難周易滋弊竇是以量爲變通以殷戶自請充商暫行試辦停止聯名保結之例茲據該督等查明現在招補缺商已

復舊額足敷辦公自應仍復舊例以示限制嗣後該商遇有歇業或緣事
黜退者方准隨時招補此外不得無故添設一商亦不限年試辦以歸覈
實其承商之時責令通關總散各商公同慎選殷實公正之人聯名保結
專案咨部著充並著該督等隨時查察毋許該總商等仍蹈從前推諉壘
斷惡習俾保充者務求覈實而走私漏稅諸弊亦責有攸歸以裕課餉而
杜姦私該部知道

